

筆叢

田集

漢書門			
類	號	函	架
二	八九	一	三五
冊	一	八	一

內閣文庫			
類	號	冊	架
漢	書	二	八九
三	九	函	一

雜家

內閣文庫		
番號	漢	2832
冊數	10 (1)	
函號	309	05

369-65

經籍會通 一之四



少室山房餘集序

吾友胡元瑞工詩善屬文有


少室山房稿賈其餘勇著書

數百卷如經籍會通史書佔

俾九流緒論四部正訛三墳

補逸二酉綴遺華陽博議莊

少室山房餘集序一



嶽委譚丹鉛新錄執林學山
自題為筆叢海內爭傳幾於
帝貴問序于不佞陳子曰大
畜象天君子多識前言徃行
大哉孔子博學無所成名達
巷黨人知足以知聖人者顏

子嘆夫子循也狀善誘人而
曰博我以文蓋吾儒之學有
博有約猶佛氏之教有頓有
漸故曰多聞則守之以約多
見則守之以卓寡聞則無約
也寡見則無卓也佛之說曰

必有實際而後真空實則攝
長河為酥酪空則納須彌于
芥子當時楚有左氏倚相鄭
有公孫僑吳有季子札號稱
多聞而未有若孔子者故天
縱之聖又多能也太史公傳

世家而曰當年不能究其禮
累世不能殫其學夫非以博
耶秦漢而後六籍煨燼唐晉
糠粃宋元支離士生其間而
汲古之綆短矣壯哉元瑞崛
起于數千載之後而尚論於

數千載之前索諸九丘之遠
論于六合之外稱文小而旨
極大舉類迥而見義遠辨往
詰之屈筆聞者願解反先代
之成案今人心服劉子玄謂
史有三長才也學也識也有

學無才猶良田萬頃黃金滿
籬而使愚者營生鮮能貨殖
有才而無學猶思兼匠石巧
若公輸而家無榘楠斧斤難
成宮室矣元瑞才高識高而
充之以學者乎竊謂元瑞為

今之良史餘稿其一班矣昔
劉孔才有皇覽陸士衡有要
覽王勰有要畧葉廷珪有海
錄吳枋有野乘非不博也而
今皆不傳或者掛一漏萬未
能詳說而反約也儒有博學

而不窮篤行而不倦幽居而
不淫上通而不困者其元瑞
之謂乎題數語弁焉以俟後
之知元瑞者

沔陽陳文燭撰



經籍會通引
筆叢甲部
凡四

經籍會通引

筆叢甲部

凡四

凡前代校綜墳典之書漢有略晉有部唐有錄
宋有目元有考志則諸史共之肇自西京迄
於勝國紀列纂脩彬彬備矣夫其淵源六籍
藪澤九流細繹百家溯洄千古固文明之盛
集鴻碩之大觀也

昭代綦隆鉅儒輩出諸所撰造比迹黃虞惟是
經籍一塗編摩尚缺槩以義非要切體實迂
繁筆研靡資歲月徒曠耳夫以霸閏之朝草

莽之士猶或拮据墳素忝竊雌黃矧
大明日揭萬象維新豈其獨盛述鴻裁彪炳宇
宙而脞談冗輯濶略曩時哉輒不自揆掇拾
補苴間以管窺加之枕藻稍銓梗槩命曰會
通匪直寄大方之嘖咲抑以為博雅之前驅
云萬曆己丑孟秋朔應麟識

筆叢

經籍會通一

東越 胡應麟 明瑞 著

新都 江湛然 清臣 輯

澱水 趙鳳城 文鎮 校

墳籍之始肇自羲黃盛於周漢衍於梁晉極於
隋唐一燼於秦再厄於莽三災於繹四蕩於
巢宋氏徵求力倍功半元人裔夷事軼言湮
聚散廢興槩可見矣述源流第一

六經刪脩尼父授受孔門卷軸篇章類崇簡要
三墳丘索湮沒不傳以大易尚書較之其體
制居可識也蓋古文峻潔迥異浮靡聖筆淵
玄亡資藻飾故卷之不足盈篋筭而擴之函冒
乾坤春秋而降諸子百家興而道術離楚漢
以還騷人才士作而文學盛此其盈縮之大
都也然泰山封禪文字萬家合雜禪通沿洄
十紀槩徵此例則古人文籍不必盡減今時
顧世類弗傳者良由洪荒始判楮墨未遑竹

簡韋編既非易致靈文秘檢又率難窺重以
祖龍裂燄煨燼之中僅存如綫漢世諸儒稍
加綴拾劉氏七略遂至三萬餘卷考諸班氏
藝文西京制作纔十二三耳世以臯夔稷契
何書可讀然乎否耶

歷朝諸史志藝文者五家前漢也舊唐也新唐
也隋也宋也班氏規模七略劉昫沿襲隋書
新唐校益舊唐而宋史所因則崇文四庫等
目也中壘父子奕葉青緗紀例編摩故應邃

密第遺書絕寡考訂靡從隋志簡編亦多散佚而類次可觀論辯多美舊唐之錄本朝大爲踈略新書間增所缺頗自精詳歐陽宋志紊亂錯雜元人製作亡足深譏大率史氏精神全寓紀傳論序次之表志之流便落二義至於經籍尤匪所先且人靡博極業謝專門聊具故事而已

自餘正史之外奉命纂修類例足徵卷軸可考若劉歆之略荀勗之部王儉之志孝緒之錄竝軼不傳宋自慶曆淳熙嘉定諸目外薦紳文士宋尤李葉竝富青緗今惟文簡目存亦多闕漏鄭氏藝文一略該括甚鉅剖核彌精良堪省閱第通志前朝失標本代有無多寡混爲一途番陽通考以四部分門實因舊史而支流派別條理井然且究極旨歸推明得失百代墳籍燁如指掌儻更因當時所有創及亾篇咸著品題稍存故實則庶幾盡善矣歷朝墳籍畜聚之多亾如隋世篇目之盛僅見

唐時按向歆七略卷三萬餘班氏東京僅覩其半莽卓之亂尺簡不存晉荀勗李克洵加鳩集宋元嘉中謝靈運校讎至六萬卷齊王儉王亮謝朓梁殷鈞任昉阮孝緒等繼造目錄率不過三萬卷蓋宋初秘閣所藏重複相揉靈運槩加哀錄諸人頗事芟除雖其數僅半於前或其實反增於舊隋文父子篤尚斯文訪輯蒐求不遺餘力名山輿壁捆載盈庭嘉則殿書遂至三十七餘萬卷書契以來特

爲浩瀚尋其正本亦止三萬七千隋志近九萬卷至開元帝累葉承平異書間出一時纂集及唐學者自著八萬餘卷古今藏書莫盛於此趙宋諸帝雅意文墨慶歷間崇文總目所載三萬餘卷累朝增益卷不盈萬宣和北狩散亡略盡至淳熙嘉定間書目乃得五萬餘卷蓋歷代帝王圖籍興廢聚散之由大都具矣夫以萬乘南面之尊石渠東觀之富通都大邑之購求故家野老之獻納而古今輯

錄不過如此蓋後人述作日益繁興則前代
流傳寢微寢滅增減乘除適得此數理勢之
自然也

舊唐書經籍志序云貞觀中令狐德棻魏徵相
次爲秘書監上言經籍亡逸請行購募并奏
引學士校定羣書大備開元三年左散騎常
侍褚無亮馬懷素侍宴言及經籍玄宗曰內
庫皆是太宗高宗先代舊書常令宮人主掌
所有殘缺未遑補緝篇卷錯亂難於檢閱卿

試爲朕整比之至七年詔公卿士庶之家所
有異書官借繕寫及四部書成上令百官入
乾元殿東廊觀之無不駭其廣九年十一月
殷踐猷王愜韋述余欽母照劉彥貞王灣劉
仲等重修成羣書四部錄二百卷右散騎常
侍元行冲奏上之自後母熨又略爲四十卷
名爲古今書錄大凡五萬一千八百五十二
卷祿山之亂兩都覆沒乾元舊籍亡散殆盡
肅宗代宗崇重儒術屢詔購募文宗時鄭覃

侍講禁中以經籍道喪屢以為言詔令秘閣
搜訪遺文四部書至五萬六千四百七十二
卷及廣明初黃巢干紀尺簡無存昭宗即位
志弘文雅收合餘燼尚二萬餘遷都洛陽遂
靡孑遺右劉昫所紀唐經籍事頗詳以端臨
通考不載節錄於此

龍城錄云開元文籍最盛至七萬卷當時司
典籍者學士四十七人張說鄭譚裴煜之侯
行成康子
玄皆與焉

太宗初即位即置弘文館聚書二十餘萬卷選

天下文學之士虞世南褚亮姚思廉歐陽詢
蔡允恭蕭德言等以本官兼學士更日宿直
至夜分乃罷又取三品以上子孫克弘文館
學生據是時尚未改武德年號也太宗甫定
內難即留意經籍如此而馬氏通考獨逸茲
事故詳載之按弘文館書至二十萬卷則自
隋三十七萬外僅再覩耳唐藝文志序稱武
德中收隋遺書僅八萬卷餘蓋一時裒益之
書按其正本當兵火動勦之後決不能過子

萬也

此條載資治通鑑陸氏所序通考亦不收蓋但據經籍考也

文皇初年亦似留意經籍貞觀中魏徵虞世南顏師古繼為秘監請購天下書選五品以上子孫工書者繕寫藏於內庫俾宮人掌之以文皇總之於上虞魏董之於下應者宜響然迄貞觀中未聞增益諸臣亦絕無目錄之修何也蓋太宗所聘志文詞所鍾嗜翰墨於經籍蓋浮慕焉未必如隋宋之竭力蒐訪也故貞觀中百事超越前代此反愧焉文思博要

至千二百卷歐虞又各自有類書而秘府二王之迹獨冠千古當時君臣所用力者可見

矣

續考新書元行冲傳虞魏等竟編輯未成顯慶中諸員役並罷去云

舊唐書志後序云三代之書經秦殆盡漢武帝河間王始重儒術於灰燼之餘拾纂亡散篇卷僅而復存劉歆七略在漢藝文志者纔三萬三千九百卷後漢蘭臺石室東觀南宮諸儒撰集部帙漸增董卓遷都載舟西上因懼寇盜沈之於河存者數船而已及魏武父子

採掇遺亡至晉摠括羣書纔二萬七千九百四十五卷及永嘉之亂洛都覆沒靡有孑遺江表所存官書凡三千一十四卷至宋謝靈運造四部書目錄凡四千五百八十二卷其後王儉復造書目凡五千七十四卷南齊王亮謝朓四部書目凡一萬八千一十卷齊宋兵火延燒祕閣書籍煨燼梁元帝克平侯景收公私經籍歸於江陵凡七萬餘卷蓋佛老之書雜於其間及周師入郢咸自焚蕩周武

保定之中纔盈萬卷平齊所得數止五千及隋氏平陳南北一統祕書監牛弘奏請搜訪遺逸著定書目凡三萬餘卷按此序記累世藏書卷軸多與隋書不同槩當從此爲正通考於諸史藝文序目纂輯靡遺獨此不錄蓋舊唐書或宋少傅端臨所未覩也

通考諸部之首亦但錄漢隋新唐俱不及舊唐

雲間陸子淵家多藏書所著別集中有統論一則云自古典籍興廢隋牛弘謂仲尼之後凡

有五厄大約謂秦火爲一厄王莽之亂爲一厄漢末爲一厄永嘉南渡爲一厄周師入郢爲一厄雖然經史具存與孔壁汲冢之復出見於劉向父子之所輯略者爲書凡三萬三千九十卷孔氏之舊蓋未嘗亡也至隋嘉則殿乃有書三十七萬卷可謂富矣柳顧言等之所校定才七萬七千餘卷則是重複猥雜張其數耳七略之外所增才倍之而諸史羣撰具焉南朝盛時梁武之世公私典籍七萬

餘卷尚有重本則傳世之書惟存舊數而已散亡之極猶不失萬卷唐世分爲四庫開元著錄者五萬三千九百一十五卷魏晉所增與釋老之編雜出其間亦不過三萬餘卷而唐之學者自爲之書又二萬八千四百六十九卷自是日有所益矣安史亂後備加搜採而四庫之書復完黃巢之禍兩京蕩然宋建隆初三館有書萬二千餘卷自後削平諸國盡收圖籍重以購募太平興國初六庫書籍

正副本凡八萬卷固半實爾慶曆崇文總目之書三萬六百六十九卷按之七略顧有不
及參互乘除所亡益者何等書耶洪容齋謂
御覽引用一千六百九十種書十七八九而
姚鉉所類文集亦多不存因以爲歎然經史
子集之舊宋亦未嘗闕焉宣和訪求一日之
內三詔竝下四方奇書由此聞出見於著錄
者溢出二萬五千二百五十四卷以克館閣
高宗渡江書籍散逸加意訪求淳熙間類次

見書凡四萬四千四百八十六卷其數雖過
於崇文而新籍兼之至於紹定之災而書復
闕矣右子淵所紀古今書籍梗槩頗爲簡明
大都本馬氏通考所載而節略之然隋書三
十七萬柳顧言等除去猥複止得三萬七千
見通考甚詳而此以爲七萬餘卷梁任昉阮
孝緒等目錄大約不過三萬雖云釋典在外
要不過二萬餘元帝收集煨燼乃得七萬未
必無重複也唐志開元書著錄者五萬三千

九百一十五卷唐學者自爲二萬八千四百六十九卷共八萬餘陸所言釋老之編雜出者三萬餘迄不詳何所指考新舊唐書咸不合宋嘉定中續得一萬八千餘卷陸亦未及載也漫識其後

牛弘所論五厄皆六代前事隋開皇之盛極矣未幾皆燼於廣陵唐開元之盛極矣俄頃悉灰於安史肅代二宗游加鳩集黃巢之亂復致蕩然宋世圖史一盛於慶曆再盛於宣和

而女真之禍成矣三盛於淳熙四盛於嘉定而蒙古之師至矣然則書自六朝之後復有五厄大業一也天寶二也廣明三也靖康四也紹定五也通前爲十厄矣

廣陵事見通考葉少蘊所引杜寶大業幸江都記此外他無所考

篤而論之則古今書籍盛聚之時大厄之會各有八焉春秋也西漢也蕭梁也隋文也開元也太和也慶曆也淳熙也皆盛聚之時也祖龍也新莽也蕭繹也隋煬也安史也黃巢也

女真也蒙古也皆大厄之會也東京之季篡
輯無聞班志率西漢東京甚希他無校集者魏晉之間採摭未
備卓曜諸兇摧頽餘燼於聚於厄俱未足云
夫古今墳籍之厄秦固誅首莽卽次之蓋秦所
焚率三代上書西漢稍稍鳩集莽又繼之故
靡尺簡也唐之厄厄於叛賊宋之厄厄於裔
夷彼非有意於焚兵燼所經玉石俱燬况書
宜火物也獨湘東以文士甘心焉罪浮政矣
煬雖雅尚卒以不道禍延薄乎云爾

大抵歷朝墳籍自唐以前槩見隋志宋興而後
通考爲詳第其卷帙之數徃徃異仝緣諸家
輯錄或但紀當時或通志一代或因仍重複
或節略猥凡故劉班接迹繁簡頓殊王謝竝
興多寡懸絕卽博洽之流勤於論覈而疑似
之迹未易精詳今細繹羣言旁參各代推尋
事勢考定異同錄其灼然者于左

西漢三萬三千九十卷 劉歆七略總目舊唐
書九十作九百非是據班志所省十家三百

餘篇而所增又數十篇僅得後數與此不合
然他無可考

東漢一萬三千二百六十九卷 班固藝文志

本劉氏七略入劉向楊雄等儒術三家

此據原注

然尚有杜林并省伊尹墨子兵類十家

亦據原注

蹴鞠二三家然所省又有劉向太史公及淮南王數家 東漢無增者

晉二萬九千九百四十五卷 荀勗四部總目

書不存見隋志序舊唐書作二萬七千九百五十四卷

東晉三千一十四卷 李克校定止此惠懷之

亂故也

東晉孝武增益三萬餘卷 徐廣校定見崇文

摠目序

宋萬四千五百八十二卷 謝靈運所校隋志

以爲六萬按六代間書尚難得晉度江才得

三千孝武時三萬恐亦重複宋初何遽能爾

當以舊唐書爲正阮氏七類數同

齊萬五千七十四卷 至王儉校脩隋志作一

萬五千七百四卷

阮作宋元徽目與舊書齊
目正同

齊永明增益一萬八千一十卷 謝朓王亮脩

諸家皆全

梁二萬三千一百六卷 任昉部集凡釋氏書

不與

梁晉通增集三萬餘卷 阮孝緒七錄總目蓋

梁世薦紳家藏併在其中秘書則或因任昉

之舊然釋道二典竝存其間則所增亦才數

千而梁世之書盡此矣

此據隋志按阮本錄四萬四千五百二十六
卷釋道與焉然亦非七萬也見弘明集

隋初一萬五千餘卷 見牛弘進書表此時合

正副本僅三萬餘湘東煨燼所存并平陳所

得也

隋大業中三萬七千餘卷 柳詒等校定總三

十七萬卷正本進御僅此然隋志總目八萬

九千餘卷蓋柳氏校定之後或有所增或唐

諸人據前代舊目芟除猥雜會為此編也諸

史藝文皆草草惟隋志盛欲備一家言追劉

王阮氏諸書序意可見大都

唐開元中八萬二千三百八十四卷 新唐書

序總舊唐書止五萬六千四百七十六卷蓋
釋道二家不與及唐人自著不全入也

唐開成中五萬六千四百七十六卷 舊唐志

序所載是時搜錄未必如前之盛蓋釋道本
朝具錄矣

宋慶曆中三萬六百六十九卷 王堯臣崇文
總目後屢增益至四萬餘卷

宋淳熙中四萬四千八十六卷 陳騏等四庫

書目後屢增益至五萬九十餘卷

考諸史藝文志往往與當時書目相左隋三萬
七千而志八萬九千六百六十六卷唐八萬
二千而舊唐後序十二萬五千九百六卷宋
崇文目四萬中興目五萬而史十一萬九千
九百七十二卷蓋史或會萃一代志但紀錄
一時故不無異同而宋史則深可疑也

前代書但計卷帙重複未分者隋嘉則殿三十

七萬唐弘文館二十萬開元中一十二萬唐
武德初宋興國初各八萬梁湘東王所收者
七萬宋謝康樂所校者六萬薦紳先生惟葉
少蘊稱十萬餘則皆爲實錄矣

古今書籍人知其厄於火而不知其厄於水者
二焉隋嘉則殿書寇亂亡軼武德初尚八萬
卷王世克平命司農少卿宋遵貴以舟載之
行經砥柱漂沒風浪十僅二三見隋志及舊
唐書經籍志后序俱云存者無幾新唐志以

盡亡其書蓋信筆不考之過也次則漢蘭臺
石室諸書董卓遷都載舟西上因罹寇盜沈
溺河中僅數船存此一事他書不載獨舊唐
經籍志後序記此考光武遷都書籍二千餘
兩諸家以爲三倍於前固非實錄而時無纂
輯尺簡不傳惜哉

凡前代書籍之厄史皆備書獨隋世篇籍最盛
而諸志不言所終考隋世諸書咸在東都煬
幸廣陵東都守禦獨完自王世克降唐唐盡

收其圖史僅八萬卷中間未嘗被火向之藏
蓄之盛竟何在耶惟杜寶大業江都記云隋
書籍三十七萬悉焚於廣陵當是實錄蓋隋
煬酷嗜經典既欲徙都廣陵必盡載諸書自
從洛陽八萬意當時副本耳宋書籍紹定間
復災所存者尚衆德祐航海蒙古之難又蕩
然矣觀此則圖籍廢興大槩關係國家氣運
豈小小哉

世共傳劉氏七略王儉七志阮孝緒七錄荀謝

任殷四部外諸史藝文所載又有晉義熙已
來新舊目錄三卷梁天監六年四部書目四
卷梁東宮四部目錄四卷梁文德殿四部目
錄四卷陳天嘉六年壽安殿四部目錄四卷
陳德教殿四部目錄四卷陳承香殿五經史
記目錄二卷隋開皇四年四部目錄四卷開
皇八年四部目錄四卷開皇二十年書目四
卷香厨四部目錄四卷隋大業正御書目錄
九卷唐羣書四錄二百卷古今書目四十卷

唐集賢書目一卷唐四庫搜訪圖書目一卷
開元四庫書目四十卷唐秘閣書目四卷僞
蜀王建書目一卷紫微樓書目一卷崇文總
目六十六卷秘閣四庫書目十卷史館書目
二卷太學書目一卷據此則前代目錄甚多
不止盛唐一二今竝不傳然前史所載惟謝
王任阮諸錄尚存全數其餘多寡槩不可得
詳矣

前代懸購遺書咸著條目隋有關書目唐有訪

書錄宋有求書錄異時人主留意若此隋文
父子所以能致三十七萬於一時者蓋民間
獻書無所不納也

書目第記書名卷軸槩不能廣唐羣書四錄乃
至二百餘卷何以浩繁若此蓋各書之下必
有論列若歆向所編者宋王堯臣總目六十
六卷亦然然但經史二部子集則闕如也董
道廣川書跋則又特主說經而已自餘諸家
僅存卷數尤氏書目則并卷數不存文簡在

宋頗負博洽稱疎略乃爾或陶氏說邪所節也唐母照有古今書錄四十卷又節略羣書四錄而成卽體製居然可見惜並不存鄭略有劉歆七略七卷又七略別錄二十卷豈七卷者目別錄乃論列與

累朝中秘所畜外薦紳文獻名藏書家代有其人漢則劉向桓譚晉則張華束皙齊則王儉陸澄梁則任昉沈約唐則李泌蘇弁皆灼灼者自餘尚衆而世不甚稱宋則李淑宋綬尤

襄董道葉夢得晁公武等大率人間所藏卷軸不過三萬若任昉四萬極矣宋又有濡須秦氏莆田鄭氏漳南吳氏荊州田氏竝著目錄盛於前朝蓋由印本易得故儲畜者多其數故不能溢也通志有吳兢西齋杜信東齋等目則唐世非無編錄但不存爾

通志又蔣或目錄都

氏目錄各一卷亦當唐人又李正議沈少卿吳良嗣李衛公歐陽叅政俱有目錄則皆宋人也

葉少蘊云本朝公卿名藏書家如宋宣獻李邯

鄂四方士民如亳州祁氏饒州吳氏荊州田氏等吾皆見其目多止四萬餘卷其間頗有不必觀者惟宋宣獻家擇之甚精止二萬許卷而按讐詳審皆勝諸家吾舊所藏僅與宋氏等而宋氏好書人所未見者吾不能盡得也按葉所紀諸家俱有書目行世載文獻通考今竝不存觀此梗槩可見其論諸家所藏多猥雜不務銓擇切中歷朝館閣之病不特宋世而已餘語咸實錄錄之

揮塵錄云承平士大夫藏書如南都戚氏歷陽沈氏廬山李氏九江陳氏鄱陽吳氏俱有名當世今皆散逸近所至郡府多藏文籍且易得本傳錄仕宦稍顯者家必有書數千卷然多失於讎校也按此則葉氏論列外又有此五家宋時文獻之盛乃爾揮塵錄又云葉少蘊少年貴盛平生好收書逾十萬卷置雪川山居建書樓以處之極爲華煥丁卯年其宅與書俱蕩一燎李泰發家舊有萬餘卷亦以

是歲火豈厄運所邁耶

廬山李氏卽子瞻作記者藏書僅九千卷則餘所列未必皆書家倚頓惟葉語可憑

唐馮贇雲仙散錄序稱家藏九世之書二十餘萬卷按唐時雕本甚稀故蘓弁家藏二萬俾於秘閣開元之盛僅八萬卷文皇二十萬卷自是重複然唐時卽重複之書亦不易得贇何人乃能有此世稱雲仙多誕此開卷一大

噓也

宋元世欲致此卽不爲難然必不計重複乃可若正本雖三萬而下可易得乎

唐世士民藏書迄無過三萬者

玉堂逢辰錄云祥符八年四月榮王宮火一日二夜所焚屋宇二千餘間三館圖籍一時俱盡大風或飄至汴水之南惟演獻禮賢宅以處諸王陳振孫曰唐末五代書籍之僅存者又厄於此火可爲太息也

魏了翁跋遂初堂書目云江元叔合江南吳越之藏凡數萬卷爲藏僕竊去市人裂之以藉物其入於安陸張氏者傳之未幾一篋之畜僅供一炊王文康李文正廬山劉莊輿南陽

井氏皆藏書者俱未久而失之宋宣獻兼有
畢文簡楊文莊二家之書不減中秘而元符
中蕩爲煙埃晁文元累世所藏自中元無事
時已有火厄至政和甲午之災尺素不存斯
理也殆有不可曉者按此記宋世諸藏書家
尤詳而皆不能久有良足慨也

齊東野語云世間凡萬物未有聚而不散者而
書爲甚隋牛弘疏請開獻書之路極論廢典
述五厄之說則書之厄也久矣今姑摭其槩

言之梁元帝江陵蓄古今圖書十四萬卷隋
嘉則殿書三十七萬卷唐惟貞觀開元最勝
兩都各聚書四部至七萬卷至宣和殿太清
樓龍圖閣御府所儲尤盛於前代今可考者
崇文總目四十六類三萬六百六十九卷史
館一萬五千餘卷予不能具數南渡以來復
加集錄館閣書目五十二類四萬四千四百
八十六卷總目一萬四千九百餘卷是皆藏
於官府耳若士大夫之家所藏在前世如張

華載書三十車杜兼聚書萬卷韋述蓄書二
萬卷鄴侯挿架三萬卷金樓子聚書八萬卷
唐吳兢西齋一萬三千四百餘卷宋承平時
如南都戚氏歷陽沈氏廬山李氏九江陳氏
鄱陽吳氏王文康李文正宋宣獻晁以道劉
莊輿皆號藏書之富邯鄲李淑五十七類二
萬三千一百八十餘卷田鎬三萬卷昭德晁
氏二萬四千五百卷南都王仲至四萬三千
餘卷而類書浩博若太平御覽之類復不與

焉次如曾南豐及李氏山房亦皆一二萬卷
然鮮有不厄於兵火者至若吾鄉故家如石
林葉氏賀氏皆號藏書之多至十萬卷其後
齊齋倪氏月河莫氏竹齋沈氏程氏賀氏皆
號藏書之家各不下數萬餘卷亦皆散失無
餘近年惟直齋陳氏書最多蓋嘗仕於莆傳
錄夾漈鄭氏方氏林氏吳氏舊書至五萬一
千一百八十餘卷且做讀書志作解題極其
精詳近亦散失至如秀巖東窻鳳山三李高

氏牟氏皆蜀人號爲史家所藏僻書尤多今亦已無餘矣吾家三世積累三君子酷嗜至鬻負郭之田以供筆札之用冥搜極討不憚勞費凡有書四萬二千餘卷及三代以來金石之刻一千五百餘種度置書種志雅二堂日事校讎居然籛金之富余小子遭時多故不善保藏善和之書一旦掃地因考今昔有感斯文爲之流涕因書以識吾過且以示子孫焉右周密所紀宋諸藏書家最爲詳盡續

考得之因全錄以見宋世民間文獻遠過漢唐總之板本易得故也昭德晁氏直齋陳氏卽通考所引二家而不及載其總目僅此足徵云

豫章漫抄云元至正初史館遣屬官馳驛求書東南異書頗出時有蜀帥紐鄰之孫盡出其家貲遍遊江南四五年間得書三十萬卷邈峽歸蜀可謂富矣今江西在江南號稱文獻故邦予來訪之藏書甚少間有一二徃徃新

自北方載至亦無甚奇書而浙中猶爲彼善
若吾吳中則有羣集有精美者矣按此及端
臨通考序則元世亦嘗屢有求書之詔第一
代典籍邈然無聞何也子淵謂越中視江右
差善蓋子淵於越中未嘗久寓且世變陵谷
或當時頗異於今故耳若精美則今猶最吳
中也其謂江右書皆自北方攜至則都下昔
固多書矣陶宗儀說郛錄雜談數百家今傳
僅十二三則宋世書勝國尚多於
今然古書出於今者
者元未必盡有也

隋文父子以天下之力收書僅三十七萬遂冠
古今元邊帥子罄一家之產驟得三十萬卷
亦宇宙奇事然但欲其多而不計重複則在
今甚不難顧正本不知幾何耳古今書籍統
計一代前後之藏徃徃無過十萬統計一朝
公私之蓄徃徃不能十萬所謂天之生財止
有此數也况元時板本尚希又非文明之世
紐氏子三十萬卷芟其重複政恐不能三萬
耳

按唐以前藏書之籍惟史志中得諸秘閣者可
徵自餘民間薦紳所儲槩不可考如漢梁子
初楊子林手錄萬卷梁任昉四萬唐蘇弁二
萬李泌三萬梁楊二氏並見桓譚新論今載
困學紀聞紀聞又云鄴侯之書
乃其父所蓄
非泌始有之皆僅存總目獨阮孝緒之四萬
類例足徵然非必其家藏也宋世藏書家至
衆目率不存尤延之遂初堂目今傳余閱之
亦多不備推之宋葉諸家當亦爾爾惟晁陳
二氏最有條理可觀陳所藏至五萬餘足爲

宋世藏書第一家據野語乃宦中盡得五姓
之書故能至是豈易易哉

濮安懿王之子宗綽蓄書七萬卷始與英宗偕
學於邸每得異書必轉以相付宗綽家本有
岳陽記者皆所賜也此國史本傳所載宣和
中其子淮安郡王仲糜進目錄三卷忠宣公
在燕得其中帙云除監本外寫本印本書籍
計二萬二千八百三十六卷觀一帙之目如
是所謂七萬卷者爲不誣矣三館秘府所未

有也盛哉右見洪景盧隨筆第宋世三館所藏不過四萬以上况英宗時尚在宋初其時板本未盛卽重復通計亦未能遽至此隨筆所計謬無疑

輟耕錄云莊蓼塘住松江府上海縣青龍鎮嘗爲宋秘書小史其家蓄書數萬卷且多手鈔者經史子集山經地志醫卜方伎稗官小說靡所不具書目以甲乙分十門蓼塘旣沒子孫不知保惜或爲蟲鼠蝕齧或爲鄰識盜竊

或供飲博之需或應糊覆之用編帙散亂所存無幾至正六年朝廷開局脩宋遼金三史詔求遺書有以書獻者予一官江南藏書多者止三家莊其一也繼命危學士樸特來選取其家慮恐兵遁圖讖干犯禁條悉付祝融氏及收拾燼餘存者又無幾矣其孫羣玉悉載入京覬領恩澤宿留日久仍布衣歸書之不幸如此按元世諸藏書家傳記罕載據陶所稱江南藏書三家其二不著姓氏惜亾從

考其何人然莊氏既沒後人隨復失之古今
藏書同一慨也

馬端臨文獻通考經籍類甚詳覈必富於家藏
廷鸞傳末不著端臨固以其入元故乃元史
亦不爲立傳以若人撰述之勤有功千古泯
沒若斯良可扼腕然此書自足永久何籍史
臣也

凡書籍時代近者勢易流傳而人多棄擲時代
遠者迹多湮沒而世罕珍藏然夷考昔人書
目叅以余所校讎往往漢多於周唐多於漢
而宋多於唐何耶周尚韋編漢始側理唐猶
傳錄宋則印摹難易之辨也其詳具末卷中

筆叢

甲部

經籍會通一

必定山房

筆叢甲部

經籍會通一

二十八

終

筆叢

筆叢

甲部

經籍會通二

東越

胡應麟

明瑞

著

新都

江湛然

清臣

輯

澱水

趙鳳城

文鎮

校

經史子集區分爲四九流百氏咸類附焉一定之體也第時代盛衰製作繁簡分門建例徃徃各殊唐宋以還始定於一今稍掇拾諸家撮其大略以著於篇述類例第二

山房

筆叢甲部

經籍會通二

二五二

夏商以前經卽史也尚書春秋是已至漢而人不任經矣於是乎作史繼之魏晉其業浸微而其書浸盛史遂析而別於經而經之名禪於佛老矣周秦之際子卽集也孟軻荀况是已至漢而人不專子矣於是乎有集繼之唐宋其體愈備而其製愈繁子遂析而入於集而子之體夷於詩騷矣

尚書經之史也春秋史之經也中庸孟氏子也而其理經故陟而經也道德冲虛經也而其理子故降而子也三者皆可以互名惟其實也集則迥不同矣

史之體遠矣董狐南史其人也晉乘楚檇其撰也然而弗傳焉春秋之前左國國語國策三家而已集之名昉於楚乎屈宋唐景皆楚也非騷賦無以有集

屢朝書目若謝客王亮謝朓任昉諸人史但言纂脩而不錄其類例其大數尚存也至李克殷鈞祖暉蕭繹輩則并其卷數皆不得而知

矣惟劉氏七略大槩存漢書中荀勗王儉阮
孝緒類例竝載諸史差可考焉觀其類例而
四部之盛衰始末亦可以槩見矣

劉歆七略一曰六藝一曰諸子一曰詩賦一曰
兵書一曰術數一曰方伎而首之輯略以總
集諸書之要則分列品題實六略耳班固藝
文志增入五家而省其十家共三十八種五
百九十六家萬三千二百六十九卷歆原數
三萬三千九十卷固節其猥冗僅得十之三

四大槩新莽之亂焚軼之餘故也然七略原
書二十卷班氏藝文僅一卷者固但存其日
耳向歆每按一書則撮其指意錄而奏之近
世所傳列禦寇戰國策皆向題辭餘可槩見
因以論奏之言附載各書之下若馬氏通考
之類以故篇帙頗繁惜今漫無所考詳其義
例六藝經也諸子兵書術數方伎四略皆子
也詩賦一略則集之名所由昉而司馬氏書
尚附春秋之末此時史籍甚微未足成類也

鄭以史記不當入經
蓋未深考此耳

王儉七志一經典二諸子三文翰四軍書五陰
陽六術藝七圖譜前六志成本劉氏六略但
易其名而益以圖譜及佛道二家名雖曰七
實九志也然不述作者之意但於書名之下
每立一傳而又作九篇條例編於卷首蓋亦
輯略之意按經不曰六藝而曰經典則史固
漸備矣隋志謂其文義淺近遠非歆向倫余
謂儉齊相佐命百事填委故無暇此浮剽其

名耳

阮孝緒七錄一經典二紀傳三子兵四文集五
伎術六佛七道又本王氏而加紀傳并諸子
兵書爲子兵陰陽術藝爲伎術又益以佛道
二家史書至是漸盛與經子竝列而佛道二
家之言大行中國矣

書之分四部也實魏荀勗始之一曰甲部紀六
藝小學等書一曰乙部紀諸子兵術等書一
曰丙部紀史記皇覽等書一曰丁部紀詩賦

圖讚等書此時史集二部尚希故王阮二目更從劉氏分七類至唐大盛於是史居子上次經佛老附子次史而終之以集定爲四部宋氏以還迺相沿襲而作者之意未有所明馬氏始倣劉向前規論其大旨體製駸駸備矣

馬懷素傳云開元中秘書省典籍散落條流無敘懷素上疏曰南齊以前墳典舊編王儉七志已後著述其數盈多隋志所書亦未詳悉

或古書近出前志闕而未編或近人相傳浮詞鄙而猶記若無編錄難辯淄澠望括檢近書篇目并前志所遺續王儉七志藏之秘府上於是召涉學之士尹知章等分部撰錄又褚無量傳云無量以舊庫內書自高宗代卽藏在宮中漸致遺逸奏請繕寫刊校以弘經籍之道玄宗令於東都乾元殿前施架排次引公卿已下入殿前令縱觀焉開元六年駕還又勅無量於麗正殿以續成前功又元行

冲傳云秘書監馬懷素集學者續王儉七志左散騎常侍褚無量於麗正殿校寫四部書事未就而懷素無量卒詔行冲總代其職於是行冲表請通撰古今書目名為羣書四錄命學士毋嬰韋述殷踐猷余欽等分部脩檢歲餘書成奏上之右三則俱舊唐書通考所未載夫以一目錄之微更三賢之手積十載之勤始就豈易易哉

其類例諸傳不載考唐藝文志皆以經史子集為次云

前史所述魏晉諸家書目條流僅舉銓次靡詳

惟阮氏七錄始末備載弘明集中余觀其分

門創義損益前規綜核之功勤且力矣隋唐

志率沿此因節錄之經典錄一易二書三詩

四禮五樂六春秋七論語八孝經九小學凡

千七百一十卷紀傳錄一國史二注曆三舊事四

職官五儀典六法制七偽史八雜傳九鬼神

十土地十一譜狀十二簿錄凡一萬四千八百八十八卷子

兵錄一儒二道三陰陽四法五名六墨七縱

橫八雜九農家十小說十一兵家凡三千八百九十四卷

文集錄一楚辭二別集三總集四雜文凡七百

五十卷術伎錄一天文二識緯三曆筭四五行五卜筮六雜占七刑法八醫經九經方十

雜藝凡三千七百佛法錄一戒律二禪定三智慧四疑似五論記凡五百卷仙道錄一

經戒二服餌三房中四符圖凡一千一百三十八卷

右分類大槩與通考合惟析伎術置四部外而

兵家尚半諸子蓋秦漢軍書最盛故劉王特

列兵家而術數方伎條流繁衍至析為二梁

世稍減因以子兵同條術數共貫唐宋以後

益微遂皆統於子矣隋唐宋志具諸史中不詳錄

宋世諸家雖咸有書目載於文獻通考其類例

悉不能詳即通考亦第據晁陳二志未必盡

自端臨也惟邯鄲之李莆田之鄭二家類例

大略可考并識下方李淑獻臣邯鄲圖書志

載其家所藏圖書五十七類經史子集通記

一千八百三十六部二萬三千三百八十六

部

卷其外又有藝術志道書志書志畫志通爲
八目十卷號圖書十志按李氏類例於四部
之外更列四目亦阮氏外篇之意然書畫一
類分爲二門有道書而無釋典不可曉也

鄭氏書目七卷莆田鄭寅子敬列所藏書爲七
錄曰經曰史曰子曰藝曰方伎曰文曰類按
唐以後不分四部而仍七錄之名惟鄭氏一
家然伎術阮氏已合而鄭仍分之大率李鄭
二家但據所藏多寡爲類不求合前人也

宋公

垂葉少蘊竝篤好而無書目蓋皆聚而弗讀
葉於經學最精博此外未聞

尤延之遂初堂書目凡經九類史十八類子十
二類集六類今全載陶宗儀說郛晁陳馬氏
三家義例大抵全此第尤時失之疎而三家
較精密耳晁讀書志陳書錄解題竝全載馬
通考中持論各有可觀

鄭漁仲藝文略凡十二類一經類九家八十八
種二禮類七家五十四種三樂類十一種四
小學十二種五史類十三家九十種六諸子

十一家四十八種七星數三家十五種八五行三十家三十三種九藝術一家十七種十醫方一家二十六種十一類書一家二種十二文三家六十六種共一百家四百二十二種一十二萬餘卷按鄭之析類頗極苦心第自唐以後四部卷數相當總之經史子集而細分之乃爲得體今藝術等書僅數百卷亦爲一類可乎

馬氏經籍考經史子集仍分四部經十三類一

易二書三詩四禮五春秋六論語七孟子八孝經九樂十讖緯十一儀注十二小學史十三類一正史二編年三起居注四雜史五傳記六故事七職官八地理九形法十時令十一譜錄十二史鈔十三史評子二十一類一儒家二道家三法家四名家五墨家六縱橫家七雜家八小說家九農家十天文家十一歷算家十二五行十三占筮十四刑法十五兵書十六醫家十七神仙十八佛家十九類

書二十雜藝集四類一別集二詩集三歌集
四總集

陸文裕藏書目序云余家學時喜收書然覲覲
屑屑不能舉羣有也壯遊兩都多見載籍然
限於力不能舉羣聚也間有殘本不售者往
往廉取之故余之書多斷闕闕少者或手自
補綴多者幸他日之偶完而未可知也正德
戊辰夏六月寓安福里宿痾新起命僮出曝
既乃次第於寓樓數年之積與一時長老朋
舊所遺歷歷在目顧而樂焉余四方人也又
慮放失是故錄而存之各繫所得儻后益焉
將以類續入焉深識

夫書莫尚於經經聖人之書也後有作焉凡切
於經咸得附矣故錄經第一理性之書倡於
宋而盛之然經之流亞也故錄理性第二語
曰經載道史載事故錄史第三書作於經史
間而非經史可附者槩曰古書故錄古書第
四聖轍既逝諸子競馳故錄諸子第五質漸

趨華而文集興焉故錄文集第六四詩既刪
體裁益衍按厥世代考高下焉故錄詩集第
七山包海滙各適厥用然妍媸錯焉類書之
謂也故錄類書第八紀見聞次時事而掌不
在官通謂之史可也故錄雜史第九山經地
志其險易敘貢賦寓王政矣故錄諸志第十
聲音之道與天地通而禮樂所由出也故錄
韻書第十一不幼教者不懋成不早醫者不
速起其道一也故錄小學醫藥第十二方藝

伎術故有成書者孔子曰雖小道必有可觀
者焉故錄雜流第十三聖作物觀一代彰矣
宣聖從周遵一統故也特爲一錄以次宸章
令甲示不敢瀆云日日制書

陸所類書諸家略備惟不及二典豈類置諸
子中耶考文裕目雜史尚別正史決不以二
典置諸子中或此
時尚未得故也

按子淵之目亦以經史子集爲次而特尊本朝
聖製分門另敘亦似合宜但宋世理性之書
自有儒術類列於子家諸志皆史也雜技皆

子也韻書卽經也似不應更爲類小學卽韻類也醫學卽伎類也二者絕不相蒙尤不應混列一塗惜余生晚不獲起前輩而質之惟類書另錄最當與余山房書目全

子淵別錄古書不過三墳汲冢之流當析而附之經史子下真者以作之時爲次僞者以出之時爲次似不必別類也余生平好鳩集經子而限於力收殘綴軼大類於淵序中所云文裕貴人也且猶若是况余寒士哉然良工苦心非全好不易識也

陰符之文高簡非先秦漢人莫能爲也三墳之文淺陋非晚宋唐人莫能爲也鄭氏以三墳列六籍之首固可大笑諸家以陰符李筌出之而列於唐則亦不詳其體矣况陰符言或類兵或類道三墳體或類易或類書尤難定例余意欲取此類及緯侯等書充倉鵬冠等子總爲僞書一類另附四部之末亦千古經籍家一快第前人絕無此目恐好古之士或

不免於顧惜耳逸周書穆天子等雖多誇誕
然文字殊古且未嘗有所依託自當入傳注
中

穆傳舊列起
居注中

凡著述最忌成心成心著於胸中則顛倒是非
雖丘山之鉅目睫之近有蔽不自知者鄭漁
仲平生不喜班固其論已過不已則訾其古
今人表可矣至謂其胸中全無倫類不當取
楊雄太玄法言樂箴三書總列儒家余考固
藝文志雄之前劉向六十七篇則七略舊目

也下注新序世說說苑列女傳四家亦不分
析固正沿其舊耳乃以固步趨劉氏尚可纔
入七略所無便失之然則向書新序說苑子
類也世說列女史類也必訾其失當歸於歆
固何與耶

凡經籍緣起皆至簡也而其卒歸於至繁經解
昉自毛韓馬融鄭玄浸盛至梁武三禮質疑
一千卷極矣編年昉自春秋荀悅袁宏浸盛
至李燾長編一千六十三卷極矣世史昉自

尚書司馬班固浸盛至脫脫宋史五百卷極
矣實錄昉自周穆魏晉浸盛至開元起居注
三千六百八十二卷極矣譜牒昉自世本梁
唐浸盛至王僧孺十八州譜七百十二卷極
矣地志昉自山海陸澄任昉浸盛至蕭德言
等五百五十五卷極矣字學昉自三蒼許慎
周研浸盛至顏真卿字海鏡源三百六十五
卷極矣字法昉自四體晉衛恒撰周越袁昂
浸盛至唐文皇晉人書蹟一千五百一十卷

極矣方書昉自張機葛洪褚澄浸盛至隋煬
帝類聚方二千六百卷極矣文選昉自摯虞
孔逭虞綽浸盛至許敬宗文館詞林一千卷
極矣文集昉自屈原蕭衍沈約浸盛至樊宗
師總集二百九十三卷極矣小說昉自燕丹
東方朔郭憲浸盛至洪邁夷堅志四百二十
卷多極矣類書昉自皇覽歐陽虞氏浸盛至
孟利貞碧玉芳林四千五十卷極矣

孟書舊唐志作四百五十爲近今從通志然
三教珠英全時亦一千三百也

凡道家之書始於周盛於漢極於晉唐凡釋氏之書始於漢盛於梁極於隋唐而皆少殺於宋之南渡而釋氏之教復極盛於元道亦庶焉至明又皆左次矣劉歆七略無所謂釋氏王儉任昉釋典皆自爲類阮孝緒七錄亦另錄釋道二家隋志略同惟新唐志附子家末通考因之蓋以道家本列九流釋典不宜更出余意二藏篇帙旣多且本方外之說分門另錄似無不可第如唐志通考亦未爲不宜

也舊唐書釋典不錄

唐開元中道藏共三千七百四十四卷其後殘缺宋王欽若等刊補洞真部六百二十卷洞元部一千一十三卷洞神部一百七十二卷太真部一千四百七卷太平部一百九十二卷太清部五百七十六卷正一部三百七十七卷凡四千三百五十九卷六部三百一十一帙釋藏唐開元中五千四十八卷嗣後屢增幾千餘卷陸子淵謂今藏不應尚仍舊數蓋其間

或有所裒益也然以西天經目較之才千百
之一耳第隋志六千餘卷今反數減於前足
徵釋教盛於六朝至唐宋間禪說勝而經典
稍左次矣

二藏余所無僅單行釋道書數千卷因通考
例附于家末子淵書目亦似未得二書

古今書籍盛衰絕不侔班氏所錄九流曰儒曰
道曰墨曰名曰法曰雜曰農曰陰陽曰縱橫
曰小說而道家外別出神仙房中陰陽外別
出天文五行縱橫外別出兵家而兵家又自

分四類蓋漢時數家極盛致然實則一也後
世雜家及神仙小說日繁故神仙自與釋典
竝列小說雜家幾半九流儒道二家遞相增
減不失舊物兵家漸寡遂合於縱橫視舊不
能十三陰陽與五行天文竝合於伎術視舊
不能什七名法間見一二墨遂絕矣

神仙本道家似不應別出然老關莊列皆譚理
之書自張道陵寇謙之杜光庭輩盛演其教
欲與釋藏相抗故以柱下爲道君又創立元

始天尊而姓之曰樂名之曰靜信亾論太始
以前卽漢秦間姓名絕少此類蓋魏晉六朝
假託宛然今讀度人大洞靈寶太清等經大
槩規模釋氏之形骸以誕誑流俗玄旨眇論
邈如也道德冲虛南華而外言煉養服食黃
庭參同足克案祖他如稚川貞白尚難盡信
况謙之光庭輩耶

爲典章經制之學者唐杜氏宋鄭氏元馬氏三
書皆與經史相出入非他類書比也然通典
僅唐以前未爲詳備通志殊有絕到而持論
過當力不副言通考旣該且覈規模意制足
稱完書而挂漏出入時或不免世代遠涉獵
廣良未易也作者固自苦心

鄭藝文略外另有圖譜一略蓋因王儉七志而
廣之其論亦精到可喜謂隋家書籍富於古
今而圖譜無所係遂至蕩然圖譜自難傳非
以無所係也宋世一二尚存今漫無可考矣
馬氏通考以譜錄入子類圖存者間亦係焉

似未爲不可也

鄭漁仲誚班孟堅漢武以前盡竊司馬遷書不以爲慙此不足爲班病子長於左傳國策固
有全錄舊文者要在各成厥體耳鄭作通志
禮略全襲通典藝文略率本唐書亦以來後
人之訕第中間考索精到處真有漢唐議論
未及者不可誣也

通考譏漁仲鈔膳杜氏原書而唐中葉後事不
復增入按宋初李宗諤等嘗奉旨續此書二

百卷起唐至德止周顯德末通志尚有此目

今不傳杜鄭馬三書或以列典故類然音韻

經籍等皆類書也

通典鄭以入類書馬以入典故陳全

鄭漁仲於文史考核最精經籍略後別著校讎
略一卷皆前人未發後學當熟叅者然其失
往往多自蹈之如詩集類崔曙以盛唐置之
晚唐許渾以晚唐置初唐此例不一又段成
式酉陽雜俎有玉格一卷所記鬼神祥異而
類之譜錄中蓋以爲品玉之書元撰樹萱錄

一卷入草木類蓋以爲種樹之書皆可絕倒其過在槩錄前志原文不復精核故爾端臨通考雖多襲晁陳而持論折衷咸自中的間有重出或類例未精然大體得之篇首會萃諸錄統論尤詳密可喜也

晏子墨之宗也而劉氏七略列於儒之首董子儒之傑也而鄭氏通志列於墨之終皆類例之大病也又通志有崔光百國詩四十三卷檢光傳乃知光答李彪百三郡國詩國爲一

卷通志書名卷數皆誤此或因仍前史然光傳失考亦鄭之疎也

鄭又有羣書會記三十六卷今不傳陳振孫云會記大略世間所有之書非必盡出其家余以爲或卽藝文略草本則宋世亦未必皆有也如子書儒家一類唐志僅存曾子子思公孫尼而通志仍有宓子等可見

阮氏古今書錄記漢藝文志書五百九十六家僅四十四家存據今傳漢以前書大約五十

餘家然鵬冠子等後世僞爲撰雜其中不下
十餘則所存之數政與阮合蓋漢以前書盡
喪於東京之末梁後未嘗亾也

阮錄又有後漢藝文志目若干卷第云八十七
家亡而不著存數按范志無藝文一類蓋謝
承書也晉中經簿一千百十九家僅七百六
十家存亾三之一至宋以後書不紀亡數蓋
世近大槩存也

凡書唐以前皆爲卷軸蓋今所謂一卷卽古之
一軸至裝輯成帙疑皆出於雕板之後然六
朝已有之阮孝緒七錄大抵五卷以上爲一
帙前代書帙之製僅此足徵因錄於左雖頗
無關涉亦博雅所必知也

經典錄	七百二十	紀傳錄	二千二百	子兵錄	五百
佛法錄	四百五	文集錄	一千三百	伎術錄	五百
仙道錄	二千五百	共	八千五百	四十七	

帙四萬四千五百餘卷

阮自著書二十一帙一百八十二卷附七錄末

今無一傳惜其用力之勤并識此餘見隋志

詳具弘明集中

文字集略正史削繁高隱傳古今時代錄雜文聲緯并諸

序錄序例共七種合所編七錄共八種

宋王堯臣崇文總目今世當有傳本余求之尚

未獲第觀黃長睿辨駁一十七條如張萬福

中唐名將陸脩靜東晉高流德山青原冢嫡

臨濟全時皆灼灼世人覩記總目至謂不詳

何人又以文選李善註在五臣後其疎淺不

學幾於王侍書題閣帖矣然長睿所駁亦有

可議葛仙公道家舊稱葛玄非稚川明甚黃

正駁之可也乃自狐疑其說豈二子稱謂尚

未洞然耶謂蔡融來鵬皆唐人見丹陽集按

二子俱晚唐人融集見通志略鵬集今世尚

傳丹陽集殷璠所輯一十八人皆盛唐高岑

先後編次之時二子蓋未生也長睿書家者

流詩人譜系故非所悉第茲僅數十條耳餘

考証碑帖甚夥雖辨論多美未必一一中程

也黃又謂鄺炎集不當置後余嘗閱鄭通志

見五代有鄺炎集一卷大謂鄭誤然漢人集中又有鄺炎三卷或五代姓名同者不可知又五代王仁裕有西江集百卷鄭志及通考俱不收見陸子淵外集今仁裕所著玉堂閒話等又間載其詩雖卑弱頗自清旨陸謂西江集詩萬首古今恐無此盛惟宋陸放翁亦然

書之有目體制雖全詳厥品流實分三種吳尤諸氏但錄一官之藏者也隋唐諸史通志一代之有者也古今書錄羣書會記並收徃籍之遺者也薦紳雅士鳩集以廣見聞館閣詞臣讎校以存故實目錄之纂例不可無第中秘盡籠天下之書故匪一家之力而故家上世之傳帳中之秘亦徃徃內府所無其目可以互稽難於偏舉鄭氏古今並載本屬大觀而讀者眩於名實代之有無家之藏畜反不可知然亦各有長也

鄭氏通志槩徵徃籍而昔人著作之旨亾所發

明馬氏通考獨紀存書而異時闕逸之篇靡從考究且自勝國而後未之及也余自總冊之歲溺志斯途南北東西訪求餘二十載經史子集類次羸三萬編誦讀滋深犁然有會間以暇日會萃二書并四代藝文諸家目錄以及儒先月旦文士雌黃續附勝國

皇朝製作稍以已意列其指歸析類分門總爲一集庶千載簡帙之廢興百氏編摩之得失一日可以盡其大都而卷軸繁猥殆至百數尚未能脫稿云

二酉山房記王長公爲余藏書室作者今附錄此云余友人胡元瑞性嗜古書籍少從其父憲使君京師君故宦薄而元瑞以嗜書故有所購訪時時乞月俸不給則脫婦簪珥而酬之又不給則解衣以繼之元瑞之橐無所不罄而獨其載書陸則惠子水則米生蓋十餘歲而盡毀其家以爲書錄其餘貲以治屋而藏焉屋凡三楹上固而下隆其趾使避濕而

四敞之可就日爲度二十又四高皆麗棟尺
度若一所藏之書爲部四其四部之一曰經
爲類十三爲家三百七十爲卷三千六百六
十二曰史爲類十爲家八百二十爲卷萬一
千二百四十四三曰子爲類二十二爲家一
千四百五十爲卷一萬二千四百四曰集爲
類十四爲家一千三百四十六爲卷一萬五
千八十合之四萬二千三百八十四卷元瑞
自言於他無所嗜所嗜獨書饑以當食渴以
當飲誦之可以當韶護覽之可以當夷施憂
藉以釋忿藉以平病藉以起色而是三楹者
無他貯所貯亦獨書書之外一榻一几一博
山一蒲團一筆一研一丹鉛之缶而已性旣
畏客客亦見畏門屏之間剝啄都盡亭午深
夜坐榻隱几焚香展卷就筆於研取丹鉛而
讎之倦則鼓琴以抒其思如是而已故人黎
惟敬以古隸扁其楹曰二酉藏書山房而屬
余爲之記按古所稱小酉山上石穴中有書

千卷相傳秦人於此學因留之故梁湘東王
文有云訪西陽之逸興見荊州記甚詳一日
藏書之所有大酉小酉二山在楚蜀間今宣
撫之所由名而段成式之著書謂之西陽雜
俎者也惟敬之所標當亦云是余因以慨夫
七雄之前蓋不惟周之藏史爲老聃之所掌
者而名山奧窟如宛委石簣禹穴洞庭之類
其靈文秘檢往往有之第旣爲造物之所恡
惜而人間之蹟困於漆書竹簡而未易廣蓋

自七雄而復一燼於秦火再潰於莽三燹於
卓僊四燬於湘東五佚於巢六竄於宣和雖
隨散隨聚而周之藏史其所餘能幾何況闐
闐之淺而責之守匹夫之力而望之致也夫
以劉向之七略僅三萬六千卷任昉又減其
三之一隋之嘉則殿名爲三十七萬餘卷而
正本亦僅三萬七千而止耳開元之際最爲
極盛至八萬卷然亦多一時之所著而宋崇
文之目又減其大半後之益者積數十年而

增募不過萬卷今元瑞以匹夫之致而闔闔
之守僅十餘年而至四萬二千三百八十四
卷不亦難哉雖然世有勤於聚而倦於讀者
卽所聚窮天下書猶亾聚也有侈於讀而儉
於辭者卽所讀窮天下書猶亾讀也元瑞旣
負高世之才竭三餘之晷窮四部之籍以勒
成乎一家之言上而皇王帝霸之猷賢嘉聖
神之蘊下及乎九流百氏亾所不討覈以藏
之乎名山大川間以餘力游刃發之乎詩若

文又以紙貴乎通邑大都不脛而馳乎四裔
之內其爲力之難殆不啻百倍於前代之藏
書者蓋必如元瑞而後可謂之聚如元瑞而
後可謂之讀也噫元瑞於書聚而讀之幾盡
矣屠龍之伎殫而世亦無所用子矣盍亦舍
而從我遊乎玉京人鳥須彌之頂有祖龍之
火不能燔而仲尼之博姑存之弗論者吾將
發其一二以窺子焉卽二酉之藏與子讀於
二酉之所得皆糟粕矣弇州老友王世貞撰

筆叢

經籍會通三

東越

胡應麟

明瑞

著

新都

江湛然

清臣

輯

澱水

趙鳳城

文鎮

校

古書歷世兵革游更間有殘編裂簡僅以空名
寓於載籍緝錄之家存而不論博雅之流論
而不議鈞奇之士顧有取焉編摩之暇辨駁
誣謬聯絡遺亡與癖古者共之述遺軼第三

甚矣秦火之烈也皇王帝霸之道聖神賢哲之
謨蕩爲烟埃所存占卜術數而已漢興六藝
始出於屋壁冢墓之中劉向父子綴拾七略
孔氏之外無復他編自餘儒墨兵農班史藝
文所志大抵春秋戰國之作夏商以前僅數
十種率皆誕幻不經當時具悉其僞今俱摘
錄類列篇中卽不耳目其書大都可槩見矣
至於占卜術數動稱黃農以上反闕秦漢之
文蓋以羸焰所遺故盛相依託其爲誣矯尤
不可言世所洞曉不復贅疣云

班藝文志所錄次序頗淆今稍據時代列之漢
以兵取天下故論兵書特盛楊僕任宏所輯
一百八十二家固取不過數十家其目尚
多依託自餘可知

神農二十篇農家又兵法一篇兵家黃帝十六篇兵家

又經四篇又銘六篇又君臣十篇又禘五十

八篇俱道家又說四十篇小說家蚩尤二篇兵形勢家

太乙兵法一篇天乙兵法三十五篇封胡五

篇風后十三篇力牧十五篇鳩冶子一篇鬼

容區三篇俱兵陰陽大禹二十七篇農家天乙三篇

謂卽成湯非前太乙也小說家務成子十一篇小伊尹五十

一篇道家又二十七篇小辛甲二十九篇鬻熊

二十二篇太公二百三十七篇俱道家尹佚二

篇墨家師曠八篇萇弘十五篇俱兵陰陽家孔甲盤

孟二十六篇雜家

凡依託不經之甚者莫如黃帝三王房中二十卷堯舜房中二十三卷湯盤庚房中二十卷

皆極野俚褻誕可誅班氏自謂芟除猥雜猥

雜孰加此者筆之正史何也第劉氏亦不應

收

醫方等錄雖亦稱述黃岐然文字古奧語致玄

眈蓋周秦之際上士哲人之作其徒欲以驚

世竊附黃岐耳今醫方但知內經等考班志

有黃帝外經十八卷又扁鵲有內經九卷外

經十二卷或卽難經也三皇惟伏羲差免誣

蠆而亦有按摩一家大是笑資

王伯厚困學紀聞云漢初去古未遠帝王遺書
猶有存者賈誼書修政語引黃帝曰道若川
谷之水其出無已其行無止顓頊曰至道不
可過也至道不可易也功莫美於去惡而爲
善罪莫大於去善而爲惡故非吾善善而已
也善緣善也非吾惡惡而已也惡緣惡也吾
日慎一日帝嚳曰緣巧者之事而學爲巧行
仁者之操而與爲仁也故節仁之器以修其
材而身專其美矣德莫高於博愛人政莫高

於博利人故政莫大於信治莫大於人吾慎

此而已矣帝堯曰吾存心於先古

凡十餘語
多史記全

不錄帝舜曰吾盡吾敬而以事吾上故見謂忠

焉吾盡吾敬以接吾敵故見謂信焉吾盡吾
敬以使吾下故見謂仁焉吾取之以敬也得
之以敬也大禹諸侯會則問於諸侯曰諸侯
以寡人爲驕乎朔日朝則問於士曰大夫以
寡人爲汰乎又曰民無食也則我弗能使也
功成而不利於民我弗能勸也湯曰學聖王

之道者其辟如日靜思而獨居譬其若火舍
學聖之道而靜思獨居辟其若去日之明於
庭而就火之光於室也可以小見而不可以
大知得賢而舉之得賢而與之辟其若登山
乎得不肖而舉之得不肖而與之其辟若下
淵乎是以君子慎其與而聖主慎其舉又曰
藥食嘗於卑然後至於貴樂言獻於貴然後
聞於卑求道者不以目而以心取道者不以
目而以耳致道者以言入道者以忠積道者

以信樹道者以人又引周文王武王問鬻子
武王問王子且師尚父淮南人間訓引堯戒
曰戰戰栗栗日慎一日人莫蹟於山而蹟於
逕此帝王大訓之存於漢者若高帝能除挾
書之律蕭相能收博士之書則倚相所讀者
必不墜矣幸而緒言尚在知者鮮焉好古之
士尚其盡心於斯按紀聞所載今見賈誼新
書中意古必尚有其書紀錄帝王格言者或
散見雜家如鬻子之類今其名不可得矣

紀聞又云漢七略所錄若齊論之問王知道孟子之外書四篇今皆亡傳莊子逸篇十有九淮南鴻烈多襲其語唐世司馬彪注猶存後漢書文選世說注藝文類聚太平御覽間見之斷圭碎璧足為匣櫝之珍博識君子或有取焉

六經之後擬作者世但知楊王一二然不止是也書亡逸故後無述焉今稍類列於篇

擬易者楊雄太玄經關朗洞極真經衛元嵩元

包張志和太易張弧素履子司馬光潛虛又

楊潛太玄經擬書者孔衍漢尚書後漢尚書

魏尚書王通續書陳正卿續尚書漢至唐十二世崔

良佐尚書演範宋韓氏續尚書

擬詩者東晉補亡王通續詩擬春秋者王通元

經之類

擬論語者楊雄法言張融家語梁武帝孔子正

言王通中說王勃次論語宋薛據孔子集語

蓋亦正言之類

擬孝經者馬融忠經徐浩廣孝經張上儒演孝
經

兵書往往有擬六經者郭良輔有武孝經員半
千有臨戎孝經無名氏有兵春秋兵家論語
農家又有賈充道大農孝經又劉炫酒孝經
皆溷襲聖典可罪也

職官類又有宋百官春秋五卷王道秀百官春
秋五十卷無名氏百官春秋二十卷蓋皆紀
傳之屬又包諳河洛春秋李荃闡外春秋俱

非編年體其他效編年者詳見下條考其義
例如王仲淹元經鄭如幾魏春秋皆以魏爲
統聖人誅叛臣攘夷狄之義安在哉

經惟春秋續述尤盛李槩戰國春秋二十卷
趙曄吳越春秋十二卷皇甫遵吳越春秋傳
十卷楊方吳越春秋削繁五卷孔衍春秋國
語十卷春秋後國語十卷劉允濟魯後春秋
十卷何承天春秋前傳十卷春秋後傳三十
卷春秋雜語十卷陸賈楚漢春秋九卷司馬

彪九州春秋十卷劉孝標九州春秋抄一卷
 胡旦漢春秋一百卷漢春秋問答一卷袁擘
 漢獻春秋十卷孔衍後漢春秋六卷孔舒元
 漢魏春秋九卷孫盛魏氏春秋二十五卷孫
 壽魏陽秋異同八卷習鑿齒漢晉陽秋五十
 四卷孫盛晉陽秋三十卷檀道鸞續晉陽秋
 二十卷杜延壽晉春秋略二十卷崔鴻十六
 國春秋一百二十卷十六國春秋略二卷蕭
 方三十國春秋三十卷三十國春秋鈔二卷

武敏之三十國春秋一百卷皇甫謐玄晏春
 秋三卷王琰宋春秋二十卷魏衡卿宋春秋
 二十卷吳均齊春秋三十卷藏嚴栖鳳春秋
 五卷蔡允恭後梁春秋十卷吳兢唐春秋三
 十卷韋述唐春秋二十卷陸長源唐春秋六
 十卷尹洙五代春秋一卷總之皆漢紀唐曆
 之類今傳者百無一二而偏記小史若越絕
 陽說等書輒十傳六七聖神經典即其名不
 易當如此况其實哉

又如晏子春秋虞氏春秋呂氏春秋李氏春秋
 之類今惟晏呂氏傳蓋子書雜家非紀載褒
 貶也虞李二書當亦此類至如杜嵩有任子
 春秋辛邕之有博揚春秋俱非諧文葛立方
 韻語陽秋是詩話明崔氏文苑春秋是文選
 竝取義而已六朝人棲鳳春秋蓋以配獲麟
 可笑宋史無玄晏春秋而有皇
 甫帝王
 世紀

曹大家有女孝經宋尚宮有女論語今傳女孝
 經乃唐人借名大家然前志竝有曹書今亡

逸矣

孔鮒有小爾雅劉伯莊有續爾雅張楫有廣雅
 曹憲有博雅李商隱有蜀爾雅羗爾雅陸佃
 有埤雅羅願有爾雅翼林慎思有續孟馮休
 有刪孟劉軻陸筠並有翼孟司馬光有疑孟
 余允文有尊孟辨陳方之有削荀吳申有非
 荀劉李二爾雅今不傳蓋宋未已亡疑孟尊
 孟二書見朱文公集餘竝未觀二荀亦亡
 又宋人有
 蕃爾雅

陸賈有新語顧譚亦有新語賈誼有新書虞喜

亦有新書桓譚有新論夏侯湛華譚劉晝各有新論崔實有政論王肅亦有政論仲長統有昌言王滂亦有昌言賈山有至言崔靈亦有至言六朝好學漢類如此

仲尼諸弟子著述傳於漢者漆雕子十三篇漆雕

開之後七略至通志皆全元龜以即開著誤也王史氏二十一篇六國

時人芊子十八篇名嬰齊人芊姓音彌皆七十子之後也

世子十六篇名碩陳人李克七篇子夏弟子景子十三篇

必子弟子公孫尼子二十八篇皆七十子之徒也

受業仲尼者曾子外必子十六篇宋景濂諸子

辨有言子二卷宋以前目錄皆無元王燾哀

集遺言為此書然猶勝偽撰遠余近得顏子

三卷亦國朝人哀集雖謂有功聖門可也孟子

史稱七篇明甚而漢志十一篇蓋七字誤分為二也

吾夫子世以文事顯而漢高世蓼侯聚特以軍

功封世以經術傳而漢武世太常臧特以詞

賦著太常有儒家十篇賦二十篇

先孔氏而著書者黃帝史孔甲盤孟二十六篇

漢志居雜家首非陳孔甲也陳博士鮒亦名甲故孔叢子後出宋人以即黃帝孔甲而又謂一名盤孟蓋盤孟宋世已亡而編目者誤記漢書有此因附會也唐志無孔叢子景濂太史以注者宋咸所纂大槩得之

吾夫子裔傳尚書者安國注尚書者穎達然梁孔衍有漢尚書魏尚書則續書不始文中子也衍所著又有春秋數種夫子二十四世孫也

戰國諸子往往有姓存名缺者西京諸子又往往有名在姓亡者今皆不可考因錄左方該洽之士或旁參曲証得其姓名以慰作者則不啻遇之旦暮矣

景子三篇

儒家兵家又十三篇

羊子四篇

儒家

侔子一篇

全上

宮孫子二篇

鄭公九篇

名家

吳子一篇

雜家

尹都尉十四篇

農家

王氏六篇

全上

李子十篇

丁子一篇

鮑子十篇

苗子五篇

魏氏六篇

以上俱兵家

白氏三十八篇

醫家

臣彭四篇

儒家

郎中嬰齊十二篇

秦零陵令信一篇

伯象先生一篇

臣說三篇

又賦九篇

臣賢一篇

以上雜家

臣饒二十五篇

臣安成一篇

臣壽七篇

以上小說家

倕一篇

兵家

臣吾十八篇

孺子冰四篇

臣昌市六篇

臣義二篇

俱詞賦家

臣瓚

見漢書注

先秦兩漢問子書名全者甚衆蓋皆以姓爲稱

故爾然其書傳者甚希又非文義所悉故往

往知其一不知其二雖博雅之士或知其二

未必知其三四也今據劉氏七略鄭氏通志

及御覽元龜等類書條載十數類於左自備

忘忽云爾非示諸大方也

兩孟子

一鄒人孟軻

七篇

一陰陽家

一篇

又易孟

氏

十一篇

兩荀子

一趙人荀况

三十一篇

一荀悅申鑒亦號

荀子

兩董子

一戰國董無心一篇 一漢董仲舒百二

三賈子

一賈誼五十一 一賈山八 一唐藍田尉一 賈某撰見八

通志

兩莊子

一莊周五十一 一莊助四 又莊安一篇

兩景子

一宓子弟子三 一兵家十三

五孫子

一道家十六 一孫武八 一孫臏八

九

一孫軫九 又晉孫綽十

二吳子

一吳起四十一 一雜家一

四李子

一李克三 一李恢三十一 一李良三

兵家十

二商子

一商鞅二十一 一商子逸書亦號商子九

四鄒子

一鄒衍四十九 一鄒奭十二 一鄒一

陽七

二田子

一田駢二十一 一田俅三

三聾子

一道家二十一 一小說十九 俱稱熊未必一人也

兩兒子

一兒寬九 一兒良一

兩劉子

一劉敬三 一梁劉勰三

必室山房

筆叢甲部

經籍會通三

十三 三十三

二桓子 一桓寬 六十篇 一桓譚新論 十七卷

二蘇子 一蘇秦 縱橫三十一篇 一蘇彥 晉參軍見

通志道家

二張子 一張儀 十篇 一張蒼 十六篇

二韓子 一韓非 五十一篇 一韓信 三篇

二徐子 一儒家 四十二人 一徐樂 一篇

二墨子 一墨家 十五卷 一兵家 班志所首

二毛公 一毛萇 詩訓故三十卷 一道家 九篇

七公孫子 一公孫尼 一公孫固 一公孫弘 一公

孫龍 一公孫發 一公孫渾邪 又汲冢有公孫

段

二王孫子 一王孫巧心 一篇 一兵形勢家 十六篇

二容成子 一陰陽家 十四篇 一房中 二十卷

二鵬冠子 一道家 一篇 一兵家 任宏所錄

二務成子 一小說 十一篇 一五行 十四卷 一房中 十三

卷六

二尉繚子 一雜家 九篇 一兵家 三十篇

二淮南子 一雜家 五十一篇 一兵家 班氏芟自容成至此疑皆一人

筆叢甲部

經籍會通三

十四

二平原君一儒家

七篇漢朱建撰

一戰國

趙公

二太玄經一楊雄

十九篇

一楊泉撰

見唐書及通志略隋藝文

志作太元經

先秦子書之名有甚奇怪者其書什九不傳因

錄此為好事談柄後世以奇恠稱者間附焉

我子一篇

墨家

處子九篇

趙人法家

世子二十二篇

儒家

兒子一篇

名良兵家

蚰子十三篇

名淵楚人道家

尸子二十篇

名佼商軼師雜家

闕子一篇

縱橫家梁武有補闕子當補此

捷子二篇

齊人道家

楚子三篇

道家

宋子十八篇

小說家

芊子十八篇

儒家

髮子

見楊用修集

朝子

見御覽又纏子見意林

寒子

道家見藝文略

少子

齊張融道家

臣君子二篇

蜀人道家

將詎子五篇

陰陽家六國

國筮子十七篇

兵陰陽家

乘丘子五篇

陰陽家六國人

宮孫子二篇

道家

長盧子九篇

道家楚人

鳩冶子一篇

兵陰陽家

游棣子一篇

法家

鄭長者一篇

道家六國時六鄭人

衛侯官十二篇

陰陽家

杜文公五篇陰陽家

魁紀公三十卷唐樊宗師

倚杆子三卷雜家元結撰

炙轂子五卷唐王獻

墨希子唐徐靈府道家

甘騏子唐温庭筠小說家

幽求子二十卷杜夷道家

贅隅子宋王晞

史記處子作劇子捷子作接子弭子作呀子涓

淵作環淵并識

庾仲容子鈔今世不傳僅馬總意林行世按宋

晁氏讀書志凡百七家三卷余所得本卷五

而所引僅六十餘家蓋又亡其半矣其書多

裁割前人言語洪景盧據所引疑古孟子與

今不全非也按景盧稱世不傳書三十餘家

今意林亦僅存半其書名則諸史藝文諸家

目錄往往可徵因錄景盧語而考列其下作

者大都亦因槩見云

容齋隨筆云唐世未知尊孟子故意林亦列其

書而有差不同者如伊尹不以一介與人亦

不取一介於人之類其他所引書如胡非子

隨巢子纏子王孫子公孫尼子阮子正部姚

信士緯殷興通語牟子周生烈子秦菁子梅
子任奕子魏朗子唐滂子鄒子孫氏成敗志
蔣子譙子鍾子張儼默記裴氏新書袁准正
書袁子正論蘇子陸子張顯析言于子顧子
諸葛子陳子要言符子諸書今皆不傳於世
亦有不知其名者矣

考見下條

隨巢子六篇胡非子三篇竝見漢藝文志注皆
云墨翟弟子也纏子不載漢志而意林引用
二條皆與董無心論難語無心戰國人著書

闢墨子纏子蓋亦戰國墨之徒也王孫子一
篇見漢志儒家注名巧心劉勰雕龍末所稱
王孫巧心卽此公孫尼七十子門人其書兩
見漢志一儒家二十八篇一雜家一篇今意
林所引但有公孫文子而無公孫尼不知其
儒家雜家也阮子書名政論魏清河太守阮
武撰姚信書名士緯梁人信又有新書二卷
竝見鄭氏通志藝文略阮法家姚名家也通
語十卷晉尚書左丞殷興撰正部論八卷後

漢侍中王逸撰竝見隋志儒家注中

凡注皆梁時目

錄有者隋世已亡故因類附之牟子二卷後漢太尉牟融撰

鄭志全列儒家今載弘明集者非也周生烈

魏人三國志有傳隋志作周生子要論亦見

儒家

潛夫論注中

秦子三卷吳秦菁撰見隋志雜

家

傳子注中

梅子一卷中言阮步兵意林以為晉

人或近之隋志作梅子新論

附桓譚下

魏朗三卷

後漢會稽人見隋志儒家唐子十卷吳唐滂

撰見隋志道家鄒子漢志有三戰國衍夷漢

鄒陽據意林所引百餘言不類戰國或當是

陽書也孫氏成敗志三卷吳孫毓撰見隋志

儒家正論下

蔣子者魏蔣濟萬機論八卷見雜家

譙子者蜀譙周法訓八卷見儒家鍾會芻蕘

論五卷

附蔣濟萬機論下

嘿記三卷吳大鴻臚張儼

撰新言五卷吳大鴻臚裴元撰析言論三十

卷晉議郎張顯撰竝隋志雜家

傳子注下

顯又有

古今訓十二卷亦見雜家正論十九卷正書

二十五卷竝袁準撰見儒家蘇子者七卷晉

征北參軍蘇彥撰陸子者十卷晉清河守陸

雲撰竝附道家唐滂子下然雜家又有蘇道立言

六卷陸澄政論十三卷不知意林所引果道

家雜家也于子十八卷晉于寶撰顧子十卷

晉楊州主簿顧夷撰竝附見儒家志林下然吳

太常顧譚有新語十二卷亦稱顧子諸葛子

五卷吳太傅諸葛恪撰見雜家然儒家又有

武侯集誠二卷亦諸葛也陳子要言十二卷

吳豫章太守陳融撰見法家符子二十卷東

晉員外郎符朗撰見道家惟任奕子未得考

而道家有魏河東太守任嘏撰道論十二卷

或字之訛也漢志外竝見隋志唐史鄭志俱全

按景盧謂諸書今皆不傳於世此殊失考諸書

非至宋始不傳自隋世已湮沒考隋經籍志

洪所列三十餘家存者惟魏朗唐滂蔣濟譙

周袁準符朗顧譚任嘏十餘家隋巢一卷胡

非公孫尼亦各一卷蓋不過十之三自餘皆

梁世所有隋一不存修史者附見其目列注

自明鄭漁仲一槩鈔入不復辯其有亡大誤
後學若馬氏意林所錄自是從仲容子鈔纂
出諸子本書雖亡其引用于子鈔者唐世故
在洪雅名博洽然於諸史藝文志不甚究心
故有此誤政與論太平御覽書目同科

今意林六十家洪所列外尚有一二僻者化清
經十卷蔡洪撰篤論四卷杜恕撰物理論十
六卷楊泉撰竝隋世已亡附見諸子注中又
體論四卷亦杜恕撰傅子百二十卷傅玄撰

竝隋世尚存者此外有湘東王鴻烈十卷楊
偉桑丘先生書二卷陸澄缺文十三卷張顯
古今訓十一卷盧辯稱謂五卷桓子一卷何
子五卷郭子三卷隋世或存或亡今率湮沒
無考大抵唐以前子書僻者略盡此矣

藝文志儒家有董無心一卷注稱難墨子歷朝
諸志咸有其目宋吳秘嘗爲注釋見通考晁
氏所紀蓋南度尚存而今不甚傳其言行亦
不少槩覩獨馬總意林引纏子云纏子修墨

子之業以教於世儒有董無心者其言修而

謬其行

缺一字

而庸言謬則難通行庸則無主

欲事纏子纏子曰文言華世不中利民傾危

繳繞之辭者竝不為墨子所修勸善兼愛子

重之右皆纏子中語蓋二人同時纏墨者蟻

董自尊其教固不足憑余獨慨夫戰國之世

釐翟之教大行聲稱積漸至與儒竝以莊周

之恣橫其敘道術特冠墨於諸家之首而三

致意焉自餘咸可例見無心生戰國世獨奮

然起闢之計其度越當時詎在漢世仲舒之

下蓋孟子與氏後一人而已而後之儒者絕

口不道其功鄭漁仲精覈藝文至謂無心為

墨氏弟子冤哉余曷能弗詳為辯也

班氏藝文於戰國諸子亦有不能盡錄者如墨

家無纏子而見於意林蓋或出於後世而實

戰國之書非偽撰也第今亦亡從考矣

原夫藝文之為志也雖義例仍乎前史實紀述

咸本當時往代之書存沒非此無以考今代

之蓄多寡非此無以徵故魏晉迭興盛衰迴
絕齊梁接踵貯積懸殊且前人製作世日以
寡後人著述世日以增遍讀歷朝諸志卷軸
簡編靡有同者粵自晉唐而下懿君賢弼亡
弗究心考文大典意在斯乎劉知幾史通以
爲附贅懸疣雷同一律而大譏隋史之非此
疎鹵之譚匪綜核之論卽後漢一書藝文無
志而東京一代典籍茫然他可槩矣

劉史通
論史諸

體甚覈獨論表志甚疎
鄭漁仲所以譏范曄也

甚矣前代之留神典籍也華嶠漢書軼矣然隋
得一十七卷存焉唐得三十一卷存焉卽殘
闕僻緩之書弗忍棄也隋十七卷蓋重購所
致唐顧倍之則承平日久屋壁之下岩石之
中有時而出也蕭子雲晉書一百二卷至唐
僅得九卷王智深宋書六十一卷至唐僅三
十卷于寶晉書止二十卷朱鳳晉書止十四
卷皆不知原數寶則散逸亡緒鳳則編緝未
成亦錄之弗忍棄也前代于典籍如此後世

非直殘缺者不可得見卽全帙以飽蠹魚可
勝嘆哉

陸子淵云宋王景文有詩總聞嘗借鈔於李伯
華家其說詩頗與文公異按景文名質蘇子
瞻全時人而此書端臨通考亦載第卷數不
同恐贗作也

一友人云嘉靖中籍沒分宜有晏元獻集一部
二十餘帙鈔本也主其事者亦博雅之士當
時深欲借鈔慮生謗議遂止余聞深爲惜之
因記里中有元人育嬰圖摹本載元獻跋語
幾七百言其文甚莊雅而書法殊有晉唐風
世但名元獻詩詞罕知其文翰者

張文潛柯山集一百卷余所得卷僅十三蓋鈔
合類書以刻非其舊也余嘗於臨安僻巷中
見鈔本書一十六帙閱之乃文潛集卷數正
全書紙半已漶滅而印記奇古裝飾都雅蓋
必名流所藏子孫以鬻市人余目之驚喜時
方報謁臬長不持一錢顧奚囊有綠羅二匹

代羔鴈者私計不足償并解所衣烏絲直掇
青蜀錦半臂罄歸之其人亦苦於書之不售
得直慨然適官中以他事勾喚因約明日余
返寓通夕不寐黎明不巾櫛訪之則夜來鄰
火延燒此書倏煨燼矣余大悵惋彌月因識
此冀博雅君子共訪或更遇云

南度以還書多端臨通考所未載者余所見小
說家如西溪叢語癸辛雜識等不下數十種
蓋馬氏所據大率本晁陳二家自餘宋末諸
人所著或未及行世通考雖成於元世其時
兵革動勦無緣掇拾今承平日久故漸出人
間不得以爲僞也

永樂中命胡廣王洪等輯大典二萬二千八百
七十七卷一萬一千九十五冊目錄六十卷
其表文載蟬精雋中蓋古今創見書也惜卷
帙繁重未傳云 見七備類稿

筆叢

甲部

經籍會通三

筆叢

經籍會通四

東越 胡應麟 明瑞 著

新都 江湛然 清臣 輯

澱水 趙鳳城 文鎮 校

古今墳籍梗槩略陳然率綜覈陳編未遑近蹟

余九齡入燕往來吳越垂三十載涉歷賓游

脞言鄙事時有足存輒綴大都附於簡末後

不之博雅徵求故實萬一在焉述見聞第四

宋世書千卷不能當唐世百唐世書千卷不能當六朝十六朝書千卷不能當三代一難易之辨也然今世書萬卷亦不能當宋千魏晉以還藏書家至寡讀南北史但數千卷率載其人傳中至唐書所載稍稍萬卷以上而數萬者尚希宋世驟盛葉石林輩弁山之藏遂至十萬蓋雕本始唐中葉至宋盛行薦紳士民有力之家但篤好則無不可致往往宋世書十卷其直僅可當六朝一至功力難易則六朝之一足以當宋世百矣

終宋世書目無十萬者葉嘗自言備見諸家皆不過四萬而甚多猥雜惟宋宣獻獨精其難者已不能盡致則弁山之藏亦僅可三四萬餘皆重複或猥雜也

今欲購書又差易於宋何也經則一十三家注疏遞梓於諸方史則二十一代類頒於太學合之便可三千餘卷宋初諸大類書合之又可三千餘卷南度類書十餘合之又可三千

餘卷

唐及勝國并附

則不啻萬卷矣釋藏金陵道藏

句曲捐數百金卽吾家物稍益神仙小說諸家合之又不下萬卷矣然猶非今所急也今人所急者先秦諸書詩流所急者盛唐諸書舉子所急者宋世諸書大約數百家弘雅之流稍加博焉錄經之閏者史之支者子之胙者集之副者又無慮數百家悉世所恒有好而且力則無弗至也然而未也過此則絕不易言矣山巖屋壁之藏牧豎之所間值丹

鉛星曆之譜方技之所共珍晉梁隱怪之譚好事之所掇拾唐宋浮沈之業遺裔之所世藏往往鈔錄傳摹人所吝恡間有刻本率寡完篇摧殘市肆蠹螭民家展轉流亡十九煨燼又如朝署典章都邑簿記地多遐僻用絕迂繁仕宦僅攜商賈希鬻諸家悉備此可缺如又如畸流洽客領異拔新時出一編人所未覩非其知暱餉遺何絲凡此數端皆極難致必多方篤好庶幾逢之不然貲鉅程陶權

壓梁竇他可力强此未易云

今宦塗率以書為贄惟上之人好焉則諸經史類書卷帙叢重者不逾時集矣朝貴達官多有數萬以上者往往猥復相揉芟之不能萬餘精綾綿標連窻委棟朝夕以享羣鼠而異書秘本百無二三蓋殘編短帙筐篚所遺羔鴈弗列位高貴冗者又無暇掇拾之名常有餘而實遠不副也

牛弘之主購書勤矣力矣鄭樵之論求書備矣精矣隋之書籍所以盛絕古今奇章力也漁仲求書之說窮極苦心計鄭藏書必富而通志所載今古混淆靡從考核甚為惜之

余自髫歲夙嬰書癖稍長從家大人宦遊諸省遍歷燕吳齊趙魯衛之墟補綴拮据垂三十載近輯山房書目前諸書外自餘所獲纔二萬餘大率窮蒐委巷廣乞名流錄之故家求諸絕域中間解衣縮食衡慮困心體膚筋骨靡所不憊收集僅茲至釋道二藏竟以非力

所及未能致也

今海內書凡聚之地有四燕市也金陵也閬闔也臨安也閩楚滇黔則余間得其梓秦晉川洛則余時友其人旁諏歷闕大槩非四方比矣兩都吳越皆余足跡所歷其賈人世業者往往識其姓名聊紀梗槩於後

燕中刻本自希然海內舟車輻輳筐篚走趨巨賈所攜故家之蓄錯出其間故特盛於他處第其直至重諸方所集者每一當吳中二道遠故也輦下所雕者每一當越中三紙貴故也

越中刻本亦希而其地適東南之會文獻之衷三吳七閩典籍萃焉諸賈多武林龍丘巧於壟斷每矚故家有儲蓄而子姓不才者以術鉤致或就其家獵取之

此蓋海內皆然

楚蜀交廣便道所攜間得新異關洛燕秦仕宦橐裝所挾往往寄鬻市中省試之歲甚可觀也

吳會金陵擅名文獻刻本至多鉅帙類書咸會

萃焉海內商賈所資二方十七閩中十三燕
越弗與也然自本方所梓外他省至者絕寡
雖連楹麗棟蒐其奇秘百不二三蓋書之所
出而非所聚也至薦紳博雅勝士韻流好古
之稱藉藉海內其藏蓄當甲諸方矣

凡燕中書肆多在大明門之右及禮部門之外
及拱宸門之西每會試舉子則書肆列於場
前每花朝後三日則移於燈市每朔望并下
瀚五日則徙於城隍廟中燈市極東城隍廟
極西皆日中貿易所也燈市歲三日城隍廟
月三日至期百貨萃焉書其一也

凡徙非徙其肆也輦肆中所有稅地張幕列架
而書置焉若綦繡錯也日昃復輦歸肆中惟
會試則稅民舍於場前月餘試畢賈歸地可
羅雀矣

凡武林書肆多在鎮海樓之外及湧金門之內
及弼教坊及清河坊皆四達衢也省試則間
徙於貢院前花朝後數日則徙於天竺大士

誕辰也上巳後月餘則徙於岳墳遊人漸衆也梵書多鬻於昭慶寺書賈皆僧也自餘委巷之中奇書秘簡往往遇之然不常有也凡金陵書肆多在三山街及太學前凡姑蘇書肆多在閶門內外及吳縣前書多精整然率其地梓也余二方皆未嘗久寓故不能舉其詳他如廣陵晉陵延陵就李吳興皆間值一二歛中則余未至也

凡刻之地有三吳也越也閩也蜀本宋最稱善近世甚希燕粵秦楚今皆有刻類自可觀而不若三方之盛其精吳爲最其多閩爲最越皆次之其直重吳爲最其直輕閩爲最越皆次之

凡印書永豐綿紙上常山東紙次之順昌書紙又次之福建竹紙爲下綿貴其白且堅東貴其潤且厚順昌堅不如綿厚不如東直以價廉取稱閩中紙短窄齟脆刻又舛訛品最下而直最廉余筐篋所收什九此物卽稍有力

者弗屑也

近閩中則不然以素所造法演而精之其厚不異於常而其堅數倍於昔其邊幅寬廣亦遠勝之價直既廉而卷軸輕省海內利之順昌廢不售矣

餘他省各有產紙余弗能備知大率閩越燕吳所用刷書不出此數者燕中自有一種紙理粗麗質擁腫而最弱久則魚爛尤在順昌下惟燕中刷書則用之

惟滇中紙最堅家君宦滇得張愈光楊用修等集其堅乃與絹素敵而色理疎慢蒼雜遠不如越中高麗爾絕佳純白滑膩如舒雪如勻粉如鋪玉惟印記用之

凡書之直之等差視其本視其刻視其紙視其裝視其刷視其緩急視其有無本視其鈔刻鈔視其譌正刻視其精粗紙視其美惡裝視其工拙印視其初終緩急視其時又視其用遠近視其代又視其方合此七者參伍而錯

綜之天下之書之直之等定矣

凡本刻者十不當鈔一鈔者十不當宋一三者之中自相較則又以精粗久近紙之美惡用之緩急爲差

凡刻閩中十不當越中七越中七不當吳中五

吳中五不當燕中三

此以地論卽吳越閩書之至燕者非燕中刻也

燕中三不當內府一五者之中自相較則又以其紙其印其裝爲差

凡印有朱者有墨者有靛者有雙印者有單印者雙印與朱必貴重用之凡板漶滅則以初印之本爲優凡裝有綾者有錦者有絹者有護以函者有標以號者吳裝最善他處無及焉閩多不裝

有裝印紙刻絕精而十不當凡本一者則不適於用或用而不適於時也有摧殘斷裂而直倍於全者有模糊漶滅而價增於善者必代之所無與地之遠也夫不適於時者遇遇則重不適於用而精焉亦遇也噫

葉少蘊云唐以前凡書籍皆寫本未有模印之
法人以藏書爲貴人不多有而藏書者精於
讎對故往往皆有善本學者以傳錄之艱故
其誦讀亦精詳五代時馮道始奏請官鑄板
印行國朝淳化中復以史記前後漢付有司
摹印自是書籍刊鏤者益多士大夫不復以
藏書爲意學者易於得書其誦讀亦因滅裂
然板本初不是正不無訛誤世旣一以板本
爲正而藏本日亡其訛謬者遂不可正甚可
惜也此論宋世誠然在今則甚相反蓋當代
板本盛行刻者工直重鉅必精加讎校始付
梓人卽未必皆善尚得十之六七而鈔錄之
本往往非讀者所急好事家以備多聞束之
高閣而已以故謬誤相仍大非刻本之比凡
書市之中無刻本則鈔本價十倍刻本一出
則鈔本咸廢不售矣

今書貴宋本以無訛字
故觀葉氏論則宋之刻
本患正在此或今之刻本當又訛於宋耶余
所見宋本訛者不少以非所習不論

葉又云天下印書以杭爲上蜀次之閩最下余

所見當今刻本蘇常為上金陵次之杭又次之近湖刻歛刻驟精遂與蘇常爭價蜀本行

世甚寡閩本最下諸方與宋世同

葉以閩本多用柔木

故易就而不精今杭本雕刻時義亦用白楊木他方或以烏柏板皆易就之故也

葉少蘊云世言雕板始自馮道此不然但監本

始馮道耳柳北訓序言其在蜀時嘗閱書肆

所鬻字書小學率雕本則唐固有之陸子淵

豫章漫抄引揮塵錄云母昭裔貧時嘗借文

選不得發憤云異日若貴當板鏤之以遺學

者後至宰相遂踐其言子淵以為與馮道不

知孰先要之皆出柳北後也載閱陸河汾燕

閒錄云隋文帝開皇十三年十二月八日勅

廢像遺經悉令雕板此印書之始據斯說則

印書實自隋朝始又在柳北先不特先馮道

母昭裔也第尚有可疑者隋世既有雕本矣

唐文皇胡不擴其遺制廣刻諸書復盡選五

品以上子弟入弘文館鈔書何耶余意隋世

所雕特浮屠經像蓋六朝崇奉釋教致然未

及槩雕他籍也唐至中葉以後始漸以其法
雕刻諸書至五代而行至宋而盛於今而極
矣活板始宋畢昇以藥泥爲之見沈氏筆談
十八卷甚詳
編綜前論則雕本肇自隋時行於唐世擴於五
代精於宋人此余參酌諸家確然可信者也
然宋盛時刻本尚希蘇長公李氏山房記謂
國初薦紳卽史漢二書不人有揮麈錄謂當
時仕宦多傳錄諸書他可見矣

談云板印書籍唐人尚未盛爲之自馮瀛王
始印五經已後典籍皆爲板本慶曆中有布
衣畢昇又爲活板其法用膠泥刻字薄如錢
唇每字爲一印火燒令堅先設一鐵板其上
以松脂蠟和紙灰之類冒之欲印則以一鐵
範置鐵板上乃密布字印滿鐵範爲一板待
就火煬之藥稍鎔則以一平板按其面則字
平如砥若止印三二本未爲簡易若印數十
百千本則極爲神速常作二鐵板一板印刷

一板已自布字此印者纔畢則第二板已具
更互用之瞬息可就每一字皆有數印如之
也等字每字有二十餘印以備一板內有重
複者不用則以紙貼之每韻爲一貼木格貯
之有奇字素無備者旋刻之以草火燒瞬息
可成不以木爲之者木理有疎密沾水則高
下不平兼與藥相粘不可取不若搗土用訖
再火令藥熔以手拂之其印自落礫不沾汚
昇死後藥印爲其羣從所得至寶藏之右俱
筆談所載今無以藥泥爲之者惟用木稱活
字云

今人事事不如古固也亦有事件而功百者書
籍是已三代漆文竹簡冗重艱難不可名狀
秦漢以還浸知鈔錄楮墨之功簡約輕省數
倍前矣然自漢至唐猶用卷軸卷必重裝一
紙表裡常兼數番且每讀一卷或每檢一事
細閱展舒甚爲煩數收集整比彌費辛勤至
唐末宋初鈔錄一變而爲印摹卷軸一變而

少室山房
爲書冊易成難毀節費便藏四善具焉邈而
上之至於漆書竹簡不但什百而且千萬矣
士生三代後此類未爲不厚幸也

又前代篆
隸與今楷

書工亦有
難易也

洪景盧云國初承五季亂離之後所在書籍印
板至少宜其焚蕩了無孑遺然太平興國中
編次御覽引用一千六百九十種其綱目並
載於首卷而雜書古詩賦又不能具錄以今
攷之無傳者十之七八矣此論未然太平御

覽蓋因襲唐諸類書文思博要三教珠英等
仍其前引書目非必宋初盡存也亦有宋世
不存而近時往往迭出者又以鈔拾類書得
之此皆余所自驗故知之最真洪以博洽名
而早列清華或未曉此曲折諸家亦鮮論及
漫爾識之

博洽必資記誦記誦必藉詩書然率有富於青
緗而貧於問學勤於訪輯而怠於鑽研者好
事家如宋秦田等氏弗論唐李鄴侯何如人

天才絕世插架三萬而史無稱不若賈耽輩
之多識也楊雄杜甫詩賦咸徵博極而不聞
畜書雄猶校讎天祿甫僻居草堂拾橡栗何
書可讀當是幼時父祖遺編長笥胷腹耳至
家無尺楮藉他人書史成名者甚衆挾累世
之藏而弗能讀散爲烏有者又比比皆然可
嘆也若劉氏父子張陸諸人庶幾兼之矣
畫家有賞鑒有好事藏書亦有二家列架連窗
牙標錦軸務爲觀美觸手如新好事家類也
枕席經史沈洎青紉却掃閉關蠹魚歲月賞
鑒家類也至收羅宋刻一卷數金列於圖繪
者雅尚可耳豈所謂藏書哉

陸文裕深著史通會要辨論甚該獨謂經籍不
必志於義未盡經籍朝廷之大典累朝人主
無不究心豈容無志但作史者當專記本朝
所有前人亡逸則宜闕之四代史俱有志餘
不然者六朝五季偏閏劬勦魏遼金元夷狄
僭竊不事詩書故應爾爾可爲法哉

鄭漁仲曰古之書籍有上世所無而出於今民間者古文尚書音唐世於宋朝竝無今出於漳州之吳氏陸機正訓隋唐二志竝無而今出於荊州之田氏三墳自是一種古書至熙豐間始出於野堂村校按漳州吳氏書目算術一家有數件古書皆三館四庫所無者臣已收入求書類矣又師春二卷甘氏星經二卷漢官典義十卷京房易抄一卷今世之所傳者皆出吳氏應知古書散落人間者不勝計求之未至耳按漁仲之言其意甚美然三墳自是毛漸僞作師春是宋人集左傳卜筮事爲之甘氏星經要亦天官家後人所補正訓自是辛德源作宋人因其自補之而謬題以陸機蓋藏書者好事之過務多得以侈異聞而僞者得乘隙欺之不可不辯

漁仲論求書之道有八一卽類以求二旁類以求三因地以求四因家以求五曰求之公六曰求之私七因人以求八因代以求可謂曲

盡求書之道非沈洎典籍者不能知然可籍
以求唐宋以下之書秦漢而上亦難致也今
唐人書亦難得宋元差足訪求

中和堂隨筆云隋煬帝命虞世南等四十人選
文章自楚辭迄大業共五千卷此恐未然自
六朝文選靡過五百卷者非必當時選擇之
嚴實以文字尚希故也至唐許敬宗文館詞
林一千卷可謂古今極盛宋文苑英華加以
唐一代文亦不能過千卷隋煬以前何得如

許之多唐類書惟孟利貞碧玉芳林四千五
十卷類書事迹本繁非文章比然余猶疑非
一人所辦舊唐孟書止四百五十卷蓋鄭氏
通志之誤今世南所選不見諸藝文志中大
率紀載之訛也

胡鴻臚侍墅談云近代士大夫積書之富莫過
於尤延之嗜書之篤亦莫過於尤延之嘗謂
饑讀之以當肉寒讀之以當裘孤寂而讀之
以當朋友幽憂而讀之以當金石琴瑟余博

雅雖遠不及延之而亦酷有嗜書之癖三世之積書頗不少辛未之夏不戒於火皆爲煨燼迄今勤搜徧括尚未半於舊藏關中非無積書之家往往束置度閣以飽蠹魚既不假人又不觸目至畀之竈下以代烝薪余每自恨蠹魚之不若也

鴻臚關中人此論積書莫過尤延之蓋尚循世俗之見而所自稱嗜書之篤至發嘆蠹魚亦足占雅尚矣且吾家故事也因錄於此云

司馬溫公獨樂園之讀書堂文史萬餘卷率公晨夕所繙閱者雖累數十年皆完好若未觸

手嘗謂其子公休日賈豎藏貨貝儒家惟此耳然當知寶惜吾每歲以上伏及重陽間視天氣晴明日卽設几案於當日所側羣書其上以曝其腦所以年月雖深終不損動至於啓卷必先視几案潔淨藉以茵褥然後端坐看之或欲行看卽承以方版未嘗敢空手捧之非惟手汗漬及亦慮觸動其腦每至看竟一版卽側右手大指回視其泐而覆以次指面燃而挾過故得不至揉熟其紙每見汝輩

多以指爪撮起甚非吾意今浮屠老氏猶知
尊敬其書豈以吾儒反不如乎汝當謹誌之
又趙子昂書跋曰聚書藏書良匪易事善觀
書者澄神端慮淨几焚香勿捲腦勿折角勿
以爪侵字勿以唾揭幅勿以作枕勿以夾刺
隨損隨修隨開隨掩後之得吾書者并奉贈
此法右二公之言真謂先得我心非良工勝
流未易識也因竝錄此以貽世之仝余好者
于水語見梁溪漫志趙語蓋祖述之見楊用

修集中

國初之博學者無如宋文憲且該通內典自云
青羅山房有書萬餘卷蓋勝國兵火致書故
不易也文憲於諸史百家靡不淹貫至蟲魚
草木胙說稗官似不甚究心昔茂先景純竝
以名世此學恐未可全棄也

成弘間館閣鉅公頗尚該洽北地諸君嗣起一
切掃除詩文之盛光絕前後而博雅之風稍
稍淪謝矣中間惟王子衡覈經術何子元治

子史楊用修特號多聞云多宋元秘籍第不知他書若何陸子淵最爲好古江東藏書目類例可見惜卷軸無從考也

嘉隆間馮汝言輯詩紀甚精詳時李伯華號畜書人有談者馮笑曰是嘗假吾書八部今未歸也陳晦伯亦嘉隆間人所爲正楊殊博覈可觀

王長公小酉館在弇州園涼風堂後藏書凡三萬卷二典不與構藏經閣貯焉爾雅樓皮宋刻書皆絕精余每讀九友歌輒冷然作天際真人想

次公亦多宋梓一日燕注司馬盡出堂中并諸古帖畫卷列左右坐客應接不暇司馬謂此山陰道上行也司馬公尤好古彙刻墳雅諸書今盛傳於世云

鄴下宗正灌父最蓄書饒著述賓客傾四方嘗餉余秘籍數種并五言八韻寄余余時尚十五六今廿載餘愧不能萬一副也頃聞已逝

因錄其詩志余感云

北郡詞林冠申楊藝苑英斯人誰繼美之子獨

成名氣掇香山秀才如澱水清鏗然全謝眺邈矣邁陰鏗綺麗風應遠沈冥思更精建安那用數大曆詎堪評著作千秋事流傳四海情吾慙下里調焉敢應全聲

黎惟敬博雅好古嘗罄秘書俸入刻劉夢得集

中多是正較他傳本為精余有元人陳君采柳文肅二集黎過澱水竝攜去約刻成寄余余以二集刻本湮滅因舉贈俾完此舉不三載惟敬下世遂并二書失之

龍丘童子鳴家藏書二萬五千卷余嘗得其目

頗多秘帙而猥雜亦十三四至諸大類書則盡缺焉蓋當時未有雕本而鈔帙故非韋布所辦且亦不易遇也

里中友人祝鳴臯束髮與余全志書無弗窺每燕中朔望日拉余往書市競錄所無賣文錢悉輸賈人諸子啼號凍餒罔顧惜年僅四十而天每念輒損神也

右四君俱余生平全志余筐箠所藏往往與互易者今相率游岱故稍記其略以識余懷自

餘交親中雅尚甚衆幸俱健七箸未敢槩及
云

國朝開基紹統大綱萬目靡不度越前朝至表
章六籍統壹聖真則巍然上揖夏商埒周而
四漢唐以降無足云也惟是儲畜一端前代
英君哲弼往往係心似亦右文之世不容後
者國初

高皇帝首命頒刻六經繼之

文皇帝躬修永樂大典草創之晨勤思載籍尚
爾矧今日綦隆之極耶近年楚試發策以蒐
集遺書爲問一時雅士多避其言竊惟我國
家汎逐腥膻肇建區宇文明之象際地極天
中秘所畜簡編固應倍屣往昔重以累

朝史局鴻鉅肩摩詎乏劉班王魏等輩而藝文
一錄尚似缺如是真有待於今日也况今雕
本盛行異書迭出較之漢唐難易萬萬相懸
誠略倣前史求書遺意稍示向方事半昔人
功必百之俟以三年之力盡括四海之藏然

後大出石渠東觀累葉秘書分命儒臣編摩
論次勒成一代弘文之典俾百世後知

皇朝儲蓄之富冠古絕今實宇宙之極觀生人
之殊際也時不可失芹曝之念恒眷眷於斯
云

歐陽永叔集古錄序云物常聚於所好而常得
於有力之疆有力而不好好之而無力雖近
且易有不能致之象犀虎豹蠻夷山海殺人
之獸然其齒角皮革可聚而有也玉出崑崙

流沙萬里之外經十餘譯乃至乎中國珠出
南海常生深淵採者腰絙而入水形色非人
往往不出則下飽蛟魚金礦於山鑿深而穴
遠篝火餽糧而後進其崖崩窟塞則遂葬於
中者率常數十百人其遠且難而又多死禍
常如此然而金玉珠璣世常兼聚而有也凡
物好之而有力則無不至也湯盤孔鼎岐陽
之鼓岱山鄒嶧會稽之刻石與夫漢魏以來
聖君賢士桓碑彝器銘詩序記下至古文籀

篆分隸諸家之字書皆三代以來至寶怪奇
偉麗工妙可喜之物其去人不遠其取之無
禍然而風霜兵火湮沒磨滅散棄於山崖墟
莽之間未嘗收拾者由世之好者少也幸而
有好之者又其力或不足故僅得其一二而
不能使其聚也夫力莫如好好莫如一予性
顯而嗜古凡世人之所貪者皆無欲於其間
故得一其所好於斯好之已篤則力雖未足
猶能致之故上自周穆王以來下更秦漢隋

唐五代外至四海九州名山大澤窮崖絕谷
荒林破塚神僊鬼物詭怪所傳莫不皆有以
爲集古錄以謂轉寫失真故因其石本軸而
藏之有卷帙次第而無時世之先後蓋其取
多而未已故隨其所得而錄之又以謂聚多
而終必散乃撮其大要別爲目錄因并載夫
可與史傳正其闕謬者以傳後學庶益於多
聞或譏予曰物多則其勢難聚久而無不散
何必區區於是哉予對曰足吾所好玩而老

蘇子瞻李氏山房記略曰象犀金玉之聚其能果不散乎予固
未能以此而易彼也

蘇子瞻李氏山房記略曰象犀珠玉怪珍之物
有悅於人之耳目而不適於用金石草木絲
麻五穀六材有適於用而用之則弊取之則
竭悅於人之耳目而適於用用之而不弊取
之而不竭者惟書乎自孔子聖人其學必始
於觀書當是時惟周之柱下史聃爲多書韓
宣子適魯然後見易象與魯春秋季札聘於

上國然後得聞詩風雅頌而楚獨有左史倚
相能讀三墳五典八索九丘士之生於是時
得見六經者蓋無幾其學可謂難矣而皆習
於禮樂深於道德非後世君子所及自秦漢
以來作者益衆紙與字畫日趨於簡便而書
益多世莫不有然學者益以苟簡何哉余猶
及見老儒先生自言其少時欲求史記漢書
而不可得幸而得之皆手自書日夜誦讀惟
恐不及近歲市人轉相摹刻諸子百家之書

日傳萬紙學者之於書多且易致如此其文
詞學術當倍蓰於昔人而後生科舉之士皆
束書不觀遊談無根此又何也余友李公擇
讀書於廬山白石菴之僧舍藏書凡九千餘
卷旣以涉其流探其源採剝其華實而咀嚙
其膏味以發於文詞見於行事聞名於當世
矣而書固自如也余旣衰且病無所用於世
而廬山固所願遊而不得者蓋將老焉盡發
公擇之藏拾其餘棄以自補庶有益乎公擇
求余文以爲記乃爲一言使來者知昔之君
子見書之難而今學者有書而不讀爲可惜
也

右歐蘇二文皆關涉經籍故錄之永叔謂好而
能一則力雖不足猶能致之余竊有深味焉
而猶惜公之不以金石之好聚於墳典也子
瞻所論較之今則書愈易求而讀者愈寡矣
李易安金石錄後序云予以建中辛巳歸趙氏
時德甫在太學每月朔望謁告出質衣取半

千錢步入相國寺市碑文果實歸相對展玩
咀嚼後二年從官便有窮盡天下古文奇字
之志傳寫未見書買名人書畫古奇器有持
徐熙牡丹圖求錢二十萬留宿計無所得卷
還之夫婦相向惋悵者數日及連守兩郡竭
俸入以事鈔槩每獲一書卽日勘校裝輯得
名畫彝器亦摩玩舒卷指摘疵病盡一燭爲
率故紙札精緻字畫全整冠於諸家每飯罷
坐歸來堂烹茶指堆積書史言某事在某書
某卷第幾葉第幾行以中否勝負爲飲茶先
後中則舉杯大笑或至茶覆懷中不得飲而
起凡書史百家字不列缺本不誤者輒市之
儲作副本靖康丙午虜犯京師旣長物不能
盡載乃先棄書之重大者畫之多幅者器之
無款識者已又棄書之監本者畫之平常者
器之重大者所載尚十五車連艦渡淮江八
月德甫以病不起時六宮往江西予遣二吏
部所存書一萬卷金石刻二千本先往洪州

至冬虜陷洪所謂連艦渡江者又散爲雲烟
矣獨餘輕小卷軸寫本李杜韓柳集世說鹽
鐵論石刻數十幅洎鼎鼐十數歸然獨存庚
戌春官軍收叛卒悉取去入李將軍家歸然
者十失五六猶有五七簏挈家寓越城一夕
爲盜穴壁負五簏去盡爲吳說運吏賤價得
之僅存不成部帙殘書冊數種忽閱此書如
見故人因記始末焉時紹興四年也

右李氏夫婦雅尚具見篇中始余以明誠所癖
金石而已讀此乃知其於書無弗聚而亦無
弗讀也亡軼之餘尚存萬卷則當其盛時又
何如耶李於文稍愧雅馴第其好而能專專
而能博博而能讀殆有過於歐蘇兩公所謂
者因頗采摭其語著於篇

胡應麟曰夫書好而弗力猶亡好也故錄廬陵
集古序夫書聚而弗讀猶無聚也故錄眉山
藏書記夫書好而聚聚而必散勢也曲士諱
之達人齊之益愈見聚者之弗可亡讀也故

卷之八

錄易安金石志終焉

[Faint, illegible handwritten text in cursive script, likely bleed-through from the reverse side of the page.]

